

BWÀKABUULWIBWÀ, NSHAPITÀ

MWÎTÀÀNÙ CITÙPÀ I



Twasàkidila wàbúngì, Mwanèètù Neville. Mukalenge àkubènéshè, mwanèètù wa balùme.

² Mwoyi wènù awu mu dindà emu, nwènù balunda bàànyì. Mbyà disànkà mu dindà emu, ne dyèsè, anyi dyèsè dinène, mündi mufwànyine kwamba, bwà kwikala baalùkile ku tabernacle eku cyàkàbìdì ne kwikala ne cikondo eci citèèka pa luseke bwà dikuukwila dyètù dyà mu dindà emu ne bwobùmwè ku nyungulukilu wa Dîyì dyà Mukalenge. Ngeela meeji ne byàkambiibwa musangu kampànda ne: “Mvwa ne disànkà pààkatwàmbilabo ne: “Tùyaayi mu nzùbu wa Mukalenge.”” Bwà kwikala cyàkàbìdì ne Mwanèètù Neville, ne balunda bàànyì bimpè ne bàà mushinga mukolè.

³ Nènku ndi ngeela meeji ne kuulu nkutalàleku ndambù, anyi kùdi kaacyuyuyà kakesè lwà paanyimà pàpa. Kàdi, ndi ngeela meeji ne, tudi ne ndambù wa màkàpakapà anùdi mwà kudikùpa naawù kapeepa ne byanza mùshindù *ewu*. Pìikalà—pìikalà...tudi ne màkàpakapà bu nwènù ne mòtèlè, bwà kuàshiya anyùnguluka ànu's. Anyi, tuvwa ne musùmbà wàwù lwà mwab'ewu, ngeela meeji ne bàcìdi ànu naawù. Ndi mmòna bàmwè bantu bàdikupa kapeepa ne mikàndà yà misambu anyi ní ncinyi cikwàbò. Nènku bìdi...cintu cimwè citùdi tuteeta kwenzela masangisha, mbwà kwepuka myaba yidì—yidì mu matùkù àcilwalwà yidì ne luuya ayi. Pa nàнку tudi...Ki bwà cinyi tudi kaaba aka mu dindà emu, bwà kucìnguluka myaba ayi. Nènku cintu cimwèpelè cìdi mwà kwenza cyòcì aci, ng'ànu Mashi à Mukalenge wetù Yesù Kilistò àdi ènza aci.

⁴ Nènku mvwa ne disànkà dyà dikema bwà kuumvwa mulubu mwímpè wà èkèleeziyà, wà mùshindù ùdiye ùtanta, wènda ùya mutàngile kumpàla ne Mukalenge, ne mùdi Nzambì ùkwata neenù mudimu ne mapà à Nyumà. Ne ndi cyà bushùwà nsàkidila Nzambì bikolè be bwà myoyi yènù yà meeji matòòke yidìYe mwà kukwàta naayi mudimu, ne ntèkemena ne Yéyè neànùlamine ànu munda mwà Njila mululàme ne mubùlàkàne awu, bwà kanùpàmbuku kuya ní nku dyàbalùme anyi ku dyàbakàjì Dyèndè nànsa.

⁵ Ndi kàbìdì muswè kusàkidila Mwanèètù Colvin ne mwanèndè wa bakàjì, ngeela meeji ne nyéyè, bàvwà babànde apa mu katanci kakesè emu bàvwà bimbe musambu wà ne: *Mu Dyulu Kamwèna Binsonji Nànsa*. Abi's mbilenga. Ncyà bushùwà ne ndi ngaanyisha aci.

⁶ Nènku ànu mwàkamba Mwanèètù Neville bwèndè yéyè ne mèmè kukaadi bidimu, nànkù ndi mwà kucyàmba bwà Mwanèètù Colvin, tudi bamanyangàne nendè kukaadi bidimu. Kàdi kuumuwvwa wimba misambu yà Èvànjeeliyò yà nkulunkulu ayi ne ukolesha bânà bèndè mu njila wa Mukalenge, bìdi bisànkisha mwoyi wànyì bikolè be. Bìdi binsànkisha bwà kumanya ne Nzambì ùcìdi ne bantu bàdi baMunange ne baMucyùka. Nènku tudi ne kusàkidila bwà bwalu abu.

⁷ Mpindyewu, kacya ànu ngàlukila, ndi ngumvwa ne bààbúngì mbabàtìjìibwe mu Diitabuujà, ne tudi ne disànkà dyàbúngì bwà cyòcì aci. Ndi mmòna mulunda wanyì mwìmpè, Mwanèètù Elmer Gabehart lwà paanyimà pàpa. Ndi muumvwe ne mmubàtìjìibwe mu Diitabuujà, ne ndi ne kusàkidila menemene bwà bwalu abu. Aci's cidi cyenza ne kasumbù kèètù kònsò kàà bulembi kàà mu Kentucky kùkale ànu bu kakumbàne, bwà kwangata ànu búngì bùdi bwangìshìibwa, kí mmwòmò anyi?

⁸ Ndi mvùluka (Ne ndi mumanye ne Rodney ùdi munkaci mwà kuntèelejila lwà mu ndekeelu mwà cibambalu mwàmwa, pùkalàye ùcìdi lwà paanyimà pàpa, ne Charlie mmusòmbe mumpàla mwànyì emu.) patùvwà ne ciibidilu cyà kupweka kuntwaku. Nsongàalùme yònsò yìvwa miswè: “Èè, n'nshìdì's,” bàvwa mwà kwangata kupicisha ndambù bu bwòbò mwà kuyisangana. Nènku mvwa nyiikilangane naabù mbambila ne kabìvwa bìmpè to. Pa nànkù mpindyewu bàdi . . . musumbà mujimà s'ukaadi mwamba kukùdimuna mucima nènku ndi ncinka ne nebikèngele ànu bwà twètù kutentemuka kuya mu citùpà cyà buloba cìdì cilonda bwà kubààluja mu njila kòkò aku. Aci's neciikale cìmpè.

⁹ Nànkù ntu misangu mikwàbò mpwekesha mèsù panshi, mutù muyiishi yònsò ewu, mu kajila kaùdì mwendele aku, ne udìkonka bwà—maalu, bwà ní—ní udi mukùne Dimiinu adi.

¹⁰ Udi . . . bààbúngì bèènù mbamanye Johnny Appleseed mu . . . wa mu Àmèrikè awu. Mòna's, kùvwa kàbìdì mu—muntu mu Suède uvwa mwangàciibwe wa mùshindù awu, ùvwa ùkuna bilòngò. Nènku bàdi bàmba ne ki bwà cinyì bàdi ne bilòngò byàbúngì bilenga mu Suède mpindyewu, nènku mbwalu wàkakuna mamiinu à bilòngò, mwaba kàna wònsò ùvwaye mwà kusangana katùpà kàà buloba kàvwà mamiinu mwà kutòlokèlamù aku. Ùvwa munange bilòngò mu mùshindù wà ne ùvwa ànu ùmyamina mamiinu nseke yònsò. Yèyè's ùkaadi mufwè kàdi bilòngò byèndè bicìdi ne mwoyi.

Ne pa kuya twàshìya paanyimà
Bidyacilu byà makàsà pa lusenga lwà bikondo;
Bidyacilu bya makàsà, bìikalà pàmwàpa
mukwàbò,
Mwikale wendela mu màzuwa pa mbù wa kàyì
tuseku wa mwoyi wa pànu apa,

Mwanèètù mudìine ne màzuwà mu màyi ne
kaciyi ditèkemena,
Pààmónaye, wàpetululakù bukolè.

11 Nènku aci's ki citùdi bwònsò tujinga kumòna, bwà ne cintu kampànda citùdi benze cyàfikisha bakwàbò ku—ku dituuta dyàkalenga ku citùdi twètù benze aci.

12 Kùdi ndambù wa matùkù mwwa musòmbè, nyiikilangana ne mulunda wanyi mukesè wa lulamatu mwab'ewu mu cimenga emu, ngàngàbuka mu myandà yà manga, Sam Adair. Ki yèyè ne: "Bishi, Bill?"

13 Ki mèmè ne: "Kaa, bilenga be, ngeela meeji, Doc." Mèmè ne; "Kàdi wèwè mwine?"

14 Ki yèyè ne: "Kaa, babèedi búngì cyanàànà." Yèyè ne: "Mwwa ne mateeta dikùmi ne àtaanu mu mapingaja emu."

15 Mèmè ne: "Èè, abi's mbîmpè bu mudibi ànu ne mmateeta kàdi kùyi upeta cintu nànsha cìmwè cibi to." Mèmè ne: "Udi mumanyè's, kùdi . . ." Twètù kuditwa mu kuyiikila maalu à kale patùcìvwà bàna bàà nsongààlùme. Ki mèmè ne: "Èè, Doc, ncyèna mumanye ne nèngìkale ne mwoyi too ne díbà kaayi to. Twètù bwònsò s'tukaadi ne bidimu makumi àtaanu ne byà munjila."

Ki yèyè ne: "Aci's ncilelèlè, Bill."

16 Ki mèmè ne: "Kàdi bidimu byònsò ebi, bidimu bitwè ku makùmi àsàtù ne cìmwè byà mudimu wà bwambi mpindyewu, ndi mulame mwoyi wànyì mulongola bwà diine díbà adi pààlwàYe. Nànku kabyèna ne bwalu to dyònsò dyàlwàYe adi."

Ki yèyè ne: "Aci's ncilelèlè."

Mèmè ne: "Disànka dinène dìndì naadi mbwà kwikala ne mwoyi bwà bakwàbò."

17 Ki yèyè ne: "Ki cìdi mwoyi ncyòci aci, cìdi cìvwija mwoyi mulelèlè, mpaùdi . . . kì ncyùdi mwà kwenza anyì kukumbaja bwèbè wèwè mwine to, kàdi ncyùdi mwà kwenza bwà bakwàbò."

18 Nwamònu's, s'ki díbà adi dyùdi ne mwoyi bulelèlè. Nènku byòbì mwà kwenzeka ne kùdikù kampànda munkaci mwètù emu utu kacya kàyìku mwenze nànku, uteeta bwà kwikala ne mwoyi bwà muntu mukwàbò, anji teetabi, kàdi umòne ne mbúngì kaayi butambidile bwà bìdi mwoyi wà pànu mukulongolwela pawikala kùyi ne mwoyi bwà cyùdi mwà kupete bwèbè nkààyebè mu nsòmbelu ewu to kàdi bwà cyùdi mwà kupèèsha muntu mukwàbò mu nsòmbelu ewu. Nènku neùsangane ne ncítambe kubèneshiibwa kupita mabanji anyì cintu kàna cyònsò cyà . . . cyùdiku mwà kwelela meeji eci. Ncyùdi mwà kwenzela muntu mukwàbò bwà kumupeepejilaku bujítù bwà mu nsòmbelu . . . Bwalu, nsòmbelu mu yèyè mwine's mbujitu. Nènku necítambeku kupeepejila muntu mukwàbò ndambù. Kwena ànu mumanyè disànka dídiku to ànu wèwè mucíteetekù kasangu kàmwè, bwà kwenzela muntu mukwàbò cintu kampànda.

¹⁹ Nènku díbà adi kumfikishaci ku dyela meeji ku bidimu makumi àsàtù ne cimwè (biikala mwà kukumbana àbìdì aa) byà mudimu wà bwambi bwà Mukalenge. Nènku ndi ngeela meeji ne muntu yònsò ùtu wela meeji bwà musangu wikalàye mwà kufika ku mudimu wèndè wà ndekeelu ne kufika ku díbà dyèndè dyà ndekeelu, ne kwela mèsù paanyimà mu njila udiyè mwendele bwà kumòna cìdì cyenjiibwe, kumòna cìdì cipitákàne ne: “Udiku mwenze cintu kampànda anyi?” Nènku bu... mungáfumu ku dyamba ne, cyùdi wenzela bakwàbò aci ki cìdì ne mushinga.

²⁰ Ntu ndikonka misangu yònsò ciikaleku pangàáfika ku ndekeelu kwà lwendu lwànyì, lutùdi katùyì bamanyè ne ncikondo kaayi cyàjikalù to, muntu nànsha umwe wa kutùdì kî mmumanyè to. Pa nàнку mvwa ngeela meeji bwà ditangila dyà paanyimà mu njila ùndi mupìcile mu mwoyi wànyì ne mumòne tukùnàkùnà tushìilàngàne ne tujila twà meebe ne mbwebwe ne myaba mikàyàbàle ne njila milenga, ne cingàakenza mu biinè bikondo byà mùshindù awu abi. Nebyèdiibwe byònsò patòòke dimwè dyà ku matùkù aa díbà dyànyì dyà lwendu. Nènku nebyenzekele muntu yònsò wa kutùdì. Netwikale bwònsò batwishìibwe bwà aci, ne nebì—nebyèdiibwe patòòke kùdì muntu yònsò pàakumbanà cikondo aci.

²¹ Nènku aci's cìdì cimfikisha anyi cìnsàka ku dyamba cintu kampànda cìndì mufwànyìne kunyeema kuya pamutù pàa kucyamba. Cìdì cìnsàka ku dyamba cintu kampànda cìndì... Cìdì cìsaamisha mwoyi wànyì bikolè bwà kucyamba, kàdì cìndì ngàmbe ndi mwenzèjìibwe bwà kucyamba, pa kumòna ne eci cìdì munkaci mwà kukwàciibwa pa mikàbà yà mèyì ne buloba bujimà nebùcìtèèleje, kàdì ndi mulekele mudimu wà bwambi bwà ka—kabingilà kàdì kantonda bwà mèmè kuwùlekela. Nènku pàmwàpa bààbùngì bèènù bàkaadi bacyumvwe, ndi munkaci mwà kukanga birò byànyì, ne bikwàbò, ne nguumuka mu budimi bwà bwambi.

²² Ncyèna mumanyè kwikala Mukalenge wetù mwà kundombola to, nènku bwà aci ncyèna ne bukòokeshi bwàci, anyì ní ncinyì cyònsò cyàkèngelaYe bwà mèmè kwenza aci. Kàdì ndi ngeela meeji ku ndekeelu wà njila kùndì ne cyà kufika. Kàdì mu lwendu lwònsò lwà mwoyi ntu mwenze bilema byàbùngì bìndì nyingaleela bikolè mu mwoyi wànyì, bwalu, ngeela meeji, bu muntu ne mu butekète ne bikwàbò, bìdì bifikisha muntu ku dyenza maalù anyì kwamba maalù mu mùshindù wà... ne kumwenzeja nànsha bìdìye kàyì muswè kwenza to munga mùshindù. Kàdì ciikàle butekète bwà muntu, mòna's, tutu—tutu ne bikondo abi. Kàdì mwaba awu... .

²³ Kwòkò cintu citù mu mwoyi wànyì bwà kwenza, cìvwa nkutèèleja Méyì à Mukalenge wetù Yesù ku ndekeelu kwà lwendu elu, wàmbe ne: “Bìvwa byenza bìmpè, musadidi Wanyì mwìmpè ne wa lulamatu.” Ne misangu yàbùngì nkàadi mwambè ne mvw'a kujinga kwikala mwimàne mwaba awu pàakambàYe

ne: “Lwâyi kûNdi”; kâdi mwya njinga bulelèlâ kuMumvwa wàmba ne: “Mbyenza bîmpè.” Ne ncivwa muumvwe Dîyi, ku cibangidilu, dyàmba ne: “Lwâyi kûNdi,” kale mu bikondo byâ difundâ dyâ Bible; kâdi ndi njinga bulelèlâ bwâ kuDyùm vwa dyàmba ne: “Mbyenza bîmpè.”

24 Kâdi piikalaku cintu cîntù misangu yònsò ngenza kujinga bwâ kwikala, cîdi majinga à mwoyi wànyì, civwa nkwikala musadidi mulelèlâ kùdi Yesù Kilstò, Mukalenge ne Musungidi wanyì. Ndi muswè bwâ bujaadiki bwànyì kwikalabù bukezùke, bukezùke menemene, bwâ ne ndi mwimàne, mu bilemâ byànyì byònsò abi ndi ànu muMunange ne mwoyi wànyì wònsò. Ne ndi ngenza nànkù mu dindâ emu ne mwoyi wànyì wònsò.

25 Nènku, bwâ bwalu abu, bidi bingenzeja bwâ kwamba ne ndi ndekela mudimu wâ bwambi, mbwalu nkujuuke cintu kampànda munkaci mwâ bantu cidi cimfikishe ku dyenza nànkù, mbwena kwamba ne, mbanguumushe mu mulongo wànyì wâ “mwambi” anyì “mwanèètù” bwâ kwikala mubiikidiibwe ne Yesù Kilstò, ne kubikidiibwa nànkù. . . nènku aci’s ncifwànyine kumvwija mufwilakanyi ne Kilstò. Kâdi ndi muswe kutwilangana ne Nzambi bu munyeemi wa mudimu pamutù pàà mème kutwilangana Nendè bu mufwilakanyi ne Kilstò bwâ kuumushila kùdiYe.

26 Mwya mucyùm vwe kùkaadi ndambù wa—wa bidimu kâdi mème kudyàmbidila ne bìvwa mbilele nàka. Kâdi mème kutwilangana ne bàmwè bàna bèètù (bândi nciyì mmòna nànsha umwe wa ku bòbò mu disangisha mu dinda emu to), bàbìdì anyi bàsàtù bààbò misangu kampànda mu lwendu lwâ dilòba, kuseemenabo kùndi batuula bwalu panshi bàmba ne: “Mwanèètù Branham, wèwè ewu kwena Maasiyâ mulaaba awu, Kilstò awu anyi?”

27 Ki mème kwela bàna bèètù bàbìdì abu mabòko ku nshìngù, anyì, bwònsò bwàbò, ki mème kwamba ne: “Bàna bèètù, ne mwànyì mwònsò mùndì muteete bwâ kwikala musadidi mulelèlâ wa Kilstò, ncyèna ntekemenaku ne nudi bafwànyine kwamba cintu bu nànkù to. Nènku cyòci cifwànyine kwikala cyambìibwe bwànyì, dîbâ adi nèndekèlè budimi bwâ bwambi ne kòndò kàà mwoyi kakezùke, ne nwènù bàdì benza nànkù awu abu nenwàmbule bujitu bwâ musùkà kàna wònsò ùmvwa mwâ kwikala musungile diine dîbâ adi awu; nwamònu’s, bwâ dinguumushisha mu budimi bwâ bwambi.” Nènku mème kudyàmbidila ne bwalu abu bwàkajikila apu.

28 Ki mème kubuumvwa misangu mikwàbò kàbìdì. Kâdi kabìvwa nànkù to. Nènku dîngâ dîtukù mu Canada mwàmwa mwanèètù kampànda kundeejaye kabèji kakesè kàà cintu civwaye mupaye mu mpayâ wendè, kàmba ne “William Branham ùdi Mukalenge wetù,” ùbàtiiza mu dîna dyâ William Branham. Wa bwalu mukesè. . . muntu wa mushinga mukolè. . . Wikala ne

mmulwishi, wíkala ne mmulwishi wanyì mvwa mwà kumanya ne cintu mbilele wêla. Kàdi mwanèètù munanga, wa musinga mukolè mulwè bwà kutonda mpèkaatù yèndè ne bilema ne wàmba mùdìye witabuuja ne mèmè ndi Yesù Kilistò.

²⁹ Nènku ndi ne mikàndà mimfùndila kumbelu, ne mabiikila à ku Chicago ne myaba mishìlèshìlàngàne, bàngeebeja ní ndi ngìtabuuja dîyì diswika adi.

³⁰ Nènku ndi ne mikàndà mimfùndila yà mishindù kàna yònsò yidì milwè mu matùkù makesè mashàale aa, ne mabiikila à ku myaba mishìlèshìlàngàne, nànkù, yàmba ne mvwa Kilistò. Bânà bèètù, aci's mmashimi à lufù, ènza bundu, makooyike à dyabùlù's! Nwamònu anyi? Nwamònu's, mèmè ndi mwanèènù. Mpindyewu, aci ncifwànyine kunyeemesha muntu kanà yònsò mu budimi bwà bwambi. Aci's ncifwànyine kwenzeja muntu kàna yònsò udi munangè Kilistò bwà kunyeema cintu cyena diinà.

³¹ Mvwa muye kùdì Mukalenge mwab'ewu ànu àbìdì àdì panshi aa, pangàakacyumvwa dyàmbedi, kukaadi bu cidimu nànkù. Kì pashìshe mèmè kuya kùdì Mukalenge ne Yèyè kuntèelela Mufundu wà pàakapàtukà Yone uyiisha, bu mùvwabo kabàyi bapete mupròfetà pa buloba munda mwà bidimu byàbùngì, mu mùshindù wà ne bàvwa. . .bwònsò bàakakèmeshiibwa mu myoyi yàbò, beela meeji ne pàmwàpa Yone ke uvwa Maasiyà awu. Nànkù dîbà adi ndi. . .Yone, kuyabò kamukonka, kàdi kubàmbilaye ne kàvwa nyèyè to. Nubalaayi aci mu Luuka nshapità mwi3, mvensà wa 15. Nènku dîbà adi. . .Kàdi ki kwenzaci bu cipuwe, nènku mèmè kucilekela nànkù.

³² Kàdi pashìshe pàakafikàbi ku eci, dîbà adi mèmè kumanya ne cintu kampàndà cidi ne cyà kwenjiibwa. Nènku ndi ngamba eci ne: “Bikèènà-kumòna ne Mwanjèlò wa Mukalenge wàkamwènekela ku musulu awu,” (piikalabi ne eci ki cidi mukenji wànyì wa ndekeelu anyi cintu cyà ndekeelu kùdì èkèleeziyà, kùdì bàà pa buloba) “bintu abi m'Bulelèlà, bwà bwalu bwà Mwanjèlò wa Mukalenge.”

³³ Kàdi ntu nshàala mupùwe pàtù bantu bàmbiikila ne mupròfetà misangu yàbùngì, bwalu *mupròfetà* mu dipungila dyà mu Anglais ùtu ànu “muyiishi, mwenji wa cipròfetà, mudyànjidi kukòbola wa Dìyì,” ne bikwàbò. Ndi mufwànyine kutwala aci bwalu udi ànu mwà kuulekela aci; kàdi pàkaadibi bwà kubiikidiibwa ne “Kilistò Mulaaba awu,” anyi cintu kampànda, aci kaayi ciwva citàmbe kumpicila. Nànkù awu ncivwa ànu mwà kutwàla aci to.

³⁴ Nànkù dîbà adi lwà pa. . .mèmè kulwa. . .Paanyimà pàa mumane kuumuka ku disangisha dyà ku Canada, mèmè kusangana ne lwà mu ba Eskimos anyi ba-Indiens mwàmwa, cikaavwa cibwele ne munkaci mwàbò amu.

35 Kàdi aci ki kumbandaci mwoyi wònsò. Ne lwendu lwà bulembi lunkaavwa mumane kulongololola ntàntà mule, ncivwa mwà kulwenza to. Mvwa ne bwôwà ne ncilu kupetakana ne njiwu yà mu kulemba, bu nwênù mwà kuumvwa cîndì njinga kwamba. Mémè kubanga kukanka bikolè, bibi kutàmba ne pândi mwimàne mwab'ewu mpindyewu apa. Nènku ncivwa ànu mwà kucitwàla kàbìdì to, bwà kwela meeji ne bidimu makumi àsàtu ne cimwè byà bwambi bitùkina mu mùkìdì wà dyabùlù, mu. . . Pangìikala muye, nebàmbe cinyi? “S’ki yèyè awu, s’ki cìvwàye aci menemene”; ne bwenzeji bwònsò bùmvwà naabù pa bantu abu, dîbà adi nudi numòna kuvwaci cìvwànyìne kafika’s, mvwa kwikala mufwilakanyi ne Kìlistò. Nènku ncìvwaku ànu mwà kucitwàla to!

36 Mémè kudyàmbidila ne: “Mbipicìibwe nànsha mémè mufwile mu meetu emu, byenze bu ne ndi mudishinde pa cingoma cyànyì anyì cintu kampànda, pa mutù pà. . .” Ki mémè kumòna ne mvwa. . . Pashìshe mémè kutuma meeji kùdì Joseph wanyì mutekète awu, ne bakwàbò, bàvwà bàkèngela kukolesha abu. Nènku ncivwa mu ngiikàdìlù wa dilemba to, ki mémè kuumuka ànu mu meetu amu ne kwalukila kumbèlu.

37 Nènku bu mu matùkù mwandamukùlù anyì dikumi nànu ncivwa mu mémè to, mu mùshindù wà ne mvwa—mvwa ngeela meeji ne mvwa munkaci mwà kujimija lungenyi. Ki mémè kulòmba ànu bantu bwònsò bwà kunshìilabo kaaba ne kunshìya nkààyaanyì bwalu ndi mu mùshindù mubì ne mubìndùluke nciyì mu mémè to ne mucibùlùke yònsò.

38 Ki mémè kudikonka; bu ne cìvwà mwà kwikala mwena lukunà wanyì, bìvwà bifwànyìne kwikala bìmpè, kàdi mvwa kwikala ànu muciseke ne mutùngùnùke ne yànyì myolòlòke; kàdi pàkaadibi ne mbànà bèètù bàà balùme bàà mushinga mukole ne bàà bakàjì bàà mushinga mukolè, dîbà adi s’ki cyàkantàpà ku mwoyi aci. Ki mémè kwamba ne: “Mukalenge, munène. . . bwalu’s mbunène bikolè bwànyì mémè, nebikèngele ànu kuumuka ne kushìya bwalu ebu mu byanza Byèbè. Ncyèna—ncyèna mumanye cintu cikwàbò nànsha cimwè cyà dyenza to.”

39 Kùkaadi ndambù wa malòlò, bwà kucìvwija cyà bushùwà, mvwa ne di—dikùmbudiibwa dyà kùdì Mukalenge. Nènku mémè kumòna bèètù bàà mushinga mukolè bengeleka n—nyòka, uvwa wa maanyìmaanyì ne mufiike, ne bàvwà bangambila, ànu mwaba awu, ne cyòci aci, nyòka awu kunsùmaye ku mukòlò. Kàdi mashi àànyì àvwà mabanjike bikolè mu mùshindù wà ne kabyàkangenzela bwalu to. Ki mémè kwela mèsù panshì, nènku úvwà mmwaba awu wàkansùminabo kumpàla. Nènku mémè kukùdimuka lukàsàlukàsà ne cingoma ne kwasa ci—cilùmyàna, nènku kulengaci cilùmyàna aci ànu pankacìnkaci.

40 Ki mwanèètù kampànda kwamba. . . mémè kukùdimuka ne cingoma cyànyì bwà kumwasa ku mutù, ki kwambaye ne:

“Kwenji nàнку to, ambula ànu mulangala ùdi panshì ku luseke lwèbè aku.” Nèнку ndi mwenze nkudimuka bwà kwambula mulangala awu, kudifindaye mu mâyi kampànda, cìvwa ànu kàà cijibajiba kakesè kàà mâyi.

⁴¹ Mémè ne: “Èè, kacyenà mwà kwenzelangana kàbidì bibì ntàntà mule mpindyewu to bwalu ndi ngeela meeji ne mwanèètù mmumanye (bànà bèètù) ne ncinganyi cìdì cifwànyine kwenzeka.” Mémè kwamba ne: “Nebìikale. . . Mmutapa mpùtá wa lufù, nàнку neáfwe.”

⁴² Nèнку ndi ndomba bààbúngì bàà ku bidimba byànyi byà èkèleeziyà wanyì mwab’ewu, mu tabernacle ewu pàmwè ne Mwanèètù Neville ne mémè, bàdì balwe kùndì ne lukonko lùmwlùmwe alu ne: Bànà bèètù bàà balùme ne bàà bakàji, ncyénaku muteete bwà kwikala musadidi mulelèlè wa Kilistò kumpàla kwènù anyì? Ncyénaku muteete bwà kwikala mwanèènù anyì? Mpindyewu, kwònsò kwikalaye aku, nnyumà kampànda pambidi pàà bantu bàà mushinga mukolè. Bantu bààbúngì mbankonke aci. Kàdì cidi—cidi nnyumà, kàdì ndi ntèkemena ne leelù ewu mmupete mpùtá wa lufù ne neáfwe ne lukàsà lwònsò bwà ngaamòna mwà kwalukila ku mudimu wa bwambi. Too ne díbà adi, nènnùlòmbe muntu ne muntu, bwà kunsambidila. Ncyèna mumanye cingènzà to. Nzùbu wanyì ukaadi wa dipaana. Ncyèna mwà kucitwàla to, mémè—mémè—mémè mushààle mwab’ewu, nènshaale ànu mubùlùke wa menemene. Nèнку ndi. . . Ndi nnulòmba bwà nwènù kunsambidila.

⁴³ Nèнку, vùlukàayi ne, pìikalabi ne nutukù nungitabuuja, pìikalabi ne nutukù nungitabuuja bu musadidi wa Kilistò, vùlukàayi ne: “Aci ncilèmà! Ncyà mafi!” EMU MMÜDÌ MUKALENGE WÀMBA! “Ncilema! Kanwikadi naaci bwalu to!” Mémè ndi mwanèènù.

Twinyikaayi mitù yètù:

⁴⁴ Taatù wa mu Dyulu, mubidi wànyì udi uzakala, byanza byànyi bidi bikankakana, bànà bàanyi bàà nkàsà mbuminyine mu bisàbaata byànyi. Èyi Nzambi, ikalaku ne luse. Ncinyi ncìndìku mémè ewu mwenze, Mukalenge, bwà kukumbanyina eci? Ndi ndòmba bwà Wìkaleku ne luse kùndì, Mukalenge, ne kùdì bwònsò. Ne kuulu kwàka, ne bantu bananga bàà mushinga mukolè abu, swàku bamòneku cilemà cyàbò ne cìdìbo benze, Mukalenge, bwà kucibula mwoyi wà mwanààbò ne ku. . . kì ng’ànù wà mwanààbò to, kàdì wà Musungidi wetù, Taatù wetù wa mu Dyulu. Ndi ndòmba bwà Wèwè kutufwila luse ku bilema byètù, Mukalenge. Enzàku bwà Mashi à cijila à Kilistò mpindyewu àtùsangishe pàmwè, Mukalenge, ne Mwonji ùdi ùswika myoyi yètù mu dinanga dyà Kilistò ne bwobùmwe ùbèneshiibwe.

45 Nzambi, swàkù bwà mulwishi udi museemene kùdì bàna bèètù bàà balùme ne bèètù bàà bakàji ne. . . swàku bwà nyòka awu atàpìke mpùtà wa lufù bwà kàmònu mwà kwikalakù kàbìdì to; àfwe ànu àfwilemù, Mukalenge. Paùdì Wenza nànkù, Taatù, nèngàalukilè cyàkàbìdì mu budimi bwà bwambi. Kàdì too ne dìbà adi, Mukalenge, mèmè ndi musadidi Webè wa mwoyi mucibùlùke, mwindìle, mwindile. Mbipìte cintu kanà cyònsò cìndì mufwànyine kwenza. Ne binsonji ne mwadi ne ditwishisha ndi muteete, Mukalenge, ne mwànyì mwònsò (Wèwè udi mumanyè mwoyi wànyì.) bwà kuciìmanyika kumpàla kwà kuyaci kule nùnkù, kàdì nciyè kutambe cintu kàna cyònsò cìndì mufwànyine kwenza. Nànkù, Taatù, nyèwù mbalambula mu byanza Byèbè ànu ku cyambilu eku kùndì muyiishèyiishe bidimu byònsò ebi. Nyèwù mbalambula mu cyanza Cyèbè.

46 Mpindyewu, citàngila Wèwè, Taatù, mu mùshindù Webè Sungasunga wa Bunzambi. Nènku piikalaci cyònsò cijike ne bintu byònsò bijike, dìbà adi musadidi Webè neàlukilè. Too ne dìbà adi nèngiikalè mwindìle bwà Wàkula naanyì, Mukalenge.

47 Tùbènèshèku mpindyewu ne tùpèeshèku disangisha dinène leelù ewu; bu mutùdì katùyì bavwile mwab'ewu ànu bwà eci to, kàdì ànu bwà kucitòokèsha, kucyela patòoke, kumpàla kwà bàà pa buloba. Bwà bààmòna mwà kumanya, Taatù, ne ndi muKunange ne muKwitàbùùje ne mwangante luseke Lwèbè, ne—ne muswè kutwà ku Cyèbè, piikalabi bikengela bwà mèmè kuya, ndekele nye, Mukalenge, ne mwoyi mukezùke ne bujaadiki bulelèlè bwà ne ndi muKwitàbùùje ne muKweyèmene. Enzàku nànkù. Nènku nènKutùmbishe ne netùKwalùjile butùmbi mu bikondo byònsò bìcilwalwà mu Yesù Kilistò. Amen.

48 Mpindyewu, mu Mifundu amu, tùbuululàayi mu Bible ku. . . Mvwa ngeela meeji mu dindà emu ne ncifwànyine kwikala cintu cìmpè, byòbì kabìyì bitàcisha Mwanèètù Neville to, bwà kutùngunuka ànu ndambù wa tusunsa mu. . .

49 Mpindyewu, ndi. . . Ncicyumvuku kàbìdì musangu nànsha ùmwè citèediibwa munkaci mwènù to. Sambilaayi ànu ne nùcilaminyine pambèlu, nuciimè. Nwamònu anyi? Ncyèna. . . Ndi—ndi—ndi—ndi ne bidimu makumi àtaanu ne bibìdì, kàdì ndi ngeela meeji ne pàmwàpa, bu Nzambi mwà kundaminyinaku, ncìdikù ne ndambù wa matùkù à mwoyi, nènku ndi muswè kupìcishila kasunsa kònsò kàà cikondo cyànyì bwà Kilistò. Nànkù, nwavùlukaayi ne, ndi nguumuka bwalu ndi musàkiibwe bwà kwenza nànkù.

50 Mpindyewu, mu Mukàndà wà Bwàkabuulwibwà, mu nshapità mwi4 mwaba utwàkashiila ditùkù adi patùvwà tulonga. . . Bwàkabuulwibwà, nshapità mwi4, ngeela meeji, ku citùpà cyà ndekeelu cyà mvensà, wa nshapità awu. Èè, mbanganyì bàdì banangè Bwàkabuulwibwà? Bilenga be! Mpindyewu, ngeela meeji ne tudi bashiile ku nshapità

mwi5—mwi5, kî mmwômò anyi? Tudi bashiile, nshapità mwi4, pa Bifùkiiibwà binaayi bidì ne mwoyi abi. Mpindyewu, tuseemenàayi ku Dîyì mpindyewu, tupwa mwoyi bintu byônsò bidì bipite abi.

⁵¹ Taatù Nzambì, Wêwè utukwàcisheku mpindyewu bu mutùdi babìndùluke, kàdi tudi tuseemena ku Dîyì. Tupwà mwoyi byônsò bidì bipite abi, tudi twambuluja mpindyewu batàngile ku cimanyinu cyà dibìikidiibwa ditùmbuke, dibìikila ditùmbùke dyà mudimu wà bwambi bwà kwikala musadidi wa Kilstò. Tùpèèshèku Dîyì mu dindà emu ne udiishè misùkà yètù yìdi ne nzala eyi, bwalu tudi tujinga, Mukalenge, ne bindile dilaabiibwa dyà mushinga mukolè dyà Nyumà Mwîmpè adi. Lwâku munkaci mwètù, Mukalenge, utùfwila luse ku mpèkaatù yètù ne matomboka ne utùlekela tulwa basadidi Bèèbè. Bwalu tudi tulòmba nùnkù mu Dîna dyà Yesù. Amen.

⁵² Mpindyewu, twètù kwangata bikondo byà èkèleeziyà, Bikondo Mwandamutekète byà Èkèleeziyà byà ndekeelu. Ne pashiishe, mpindyewu, ngeela meeji ne bàmwè bàà kùdìbo bàdi bàteeta bwà...nebàbifundè, bikondo byà èkèleeziyà ebi. Pashiishe tudi tubwela mu nshapità mwi4 wa Mukàndà wa *Bwàkabuulwibwà Wà*... Eci ncinyi? *Dibuuludiibwa Dyà Yesù Kilstò. Dibuuludiibwa*, dibìikidiibwa mu Latin ne, *Bwàkabuulwibwà*, mbwena kwamba ne “kubuuludiibwa, kuumusha ci—cibwikidiji pa, kuleeja patòòke, kwela patòòke,” bwà kupatula dibuulula dyà Yesù Kilstò Wàkadiku awu, Udiku, ne Wàlwà, Muji ne Mutòlokù wà Davidi.

⁵³ Mpindyewu, mu nshapità mwi4, tudi tusangana ne Yone wàkambwibwa mu Dyulu paanyimà pàà yèyè mumanè kumòna bikondo byà èkèleeziyà. Ànu bwà kupeta mwaba mukesè wà kutèekela bitùdi twamba mpindyewu, ne pashiishe netwikalè. . .

⁵⁴ Pàmwàpa nebìikale bitàmbe bwîmpè bwà kubala ndambù wa mvensà yà nshapità mwi5, ne pashiishe netùbangile buludi pa mwaba wà kutèekela byà kwamba awu.

Ki mèmè kumòna mu cyanza cyà dyàbalùmè cyà ewu uwu musòmbè pa nkwasu wa butùmbi awu mukàndà mufunda munda ne...paanyimà, mutwà bitampì mwandamutekète.

Nènku mèmè kumòna mwanjèlò wa dikàndà ukobola ne dîyì dikolè ne: Nganyi udi mukambanyine kubuulula mukàndà, ne kulamuna bitampì byàwù?

Nènku muntu nànsha umwe mu dyulu, anyi pa buloba, ní mwinshi mwà buloba, kàvwa mukumbàne mwà kubuulula mukàndà, anyi kuwùtàngila.

Ki mèmè kwasa mwadi. . . bwalu muntu nànsha umwe kàakasanganyiibwa mukumbanyine bwà kubuulula ne. . . kubala mukàndà, anyi kuwùtàngila.

Ki umwe wa ku bakùlù kungambilayè ne: Kùdidi to: mòna, Ntambwe wa cisàmbà cyà...cyà Yuda, Muji wà Davidi, wàkumana kutàmba bukole bwà kukangula mukàndà, ne kulamuna bitampì byàwù mwandamutekète.

Nènku mémè kutàngila, ne, mònaayi, munkaci mwà nkwasà wa butùmbi ne...bifukùbwa binaayi abi, ne munkaci mwà bakùlù, Mwànà wa mùkòòkò mwimane bu mumana kushipa, mwikale ne nsèngu mwandamutekète ne mèsù mwandamutekète, àdi miikale Nyumà mwandamutekète yà Nzambi mitùma mu buloba bujimà.

Ki kulwaye kwangata mukàndà mu cyanza cyà dyàbalùme cyà ewu uvwa musòmbè pa nkwasà wa butùmbi awu.

Ayi ki mvensà mwandamutekète yà ntwàdijilu ayi.

⁵⁵ Mpindyewu, mpindyewu, mu nshapità mwi3 wa Bwàkabuulwibwà, tudi tusangana ndekeelu wa Cikondo cyà Èkèleeziyà, cidì cijikija ne cikondo cyà Laòdikiyà, cikondo cyà èkèleeziyà cyà civùmvù aci. Pashiishe tudi tusangana ne, dyàkàmwe paanyimà pàà cyòci aci, Yone wàkambwibwa mu Nyumà, mu Maulu. Ne kumònaye maalu àkadiku, ne àvwa ne cyà kulwa, ne àvwàku. Mpindyewu, tudi tusangana ne, èkèleeziyà kèna kàbidi ùmwènèka to too ne ku nshapità wa 19 wa Bwàkabuulwibwà, pashiishe èkèleeziyà ùdi walukila pàmwe ne Mukalenge wendè, mwowèshiiibwe ne butùmbi mu Mashi.

⁵⁶ Mpindyewu, mu diyì ditèèla dyà ndekeelu edi, bwà mwaba mukesè wà kutèekela byà dyamba bwà kufika mwaba ùdi Yone ùsanganyiiibwa mpindyewu, tudi tusangana ne mu diyiiisha dyà ndekeelu. . .mvwa ànu munkaci mwà kudikenketa mu cikòsò makèèlèlè awu, yimwè yà ku mifundu yimvwa mwakule. Nènku Yone wàkambwibwa mu Dyulu ne kumònaye maalu awu. Nènku mvwa mumònemù ne Yèyè wàkampèèsha dibuulula, ne... Nudi bamanyè's, paanyimà pàà dibiiishiibwa Dyèndè dyà ku lufù bantu bààbúngì bàvwa Nèndè, kàdi bàngà kwambabò ne: "Ncinyi cyenzekela muntu udi muKweyemene mu cyàdi ewu (Yone)?"

⁵⁷ Yesù kukùdimuka e kwamba ne: "Bwènù mbwèpi bu yèyè mwà kushààla too ne pàNgààlwà?" Pa nàнку Yèyè kàtukù. . .

⁵⁸ Dibà adi ki kukùtukakù dilongesha kampànda's. Nwamònu's mùdibi mwà kubanga bipeepèle anyi? Kukùtukakù dilongesha dyà ne—dyà ne "Yone kàakufwà to too ne pàmònaye Yesù ùlwa, anyi too ne ku Dilwa Diibìdi." Bible mmwambè ne kwàkapàtuka dilongesha mu cyòci aci.

⁵⁹ Pààbì, Yesù kàvwakù mucyàmbe mùshindù awu to. Wàkamba ne: "Bwènù mbwèpi bu yèyè mwà kushààla too ne pàNgààlwà?"

60 Mpindyewu, tudi tujandula ne yêyè wàkabàndishiibwa too ne mu maulu ne kumònaye kubangila díbà adi too ne ku dilwa dyà Mukalenge, byenze bu ne yêyè wàkadipù ne mubìmòne byònsò abi byènzeka. Yone yêyè mwine kàakashààla ne mwoyi to. . . Wàkashààla ne mwoyi too ne ku bidimu makumi citèemà ne byà mu njila, ne pashiishe kufwàye mu lufù lwà—lwà bantu bwònsò elu (umwèpelè wa ku bàpostòlò) paanyimà pàà dyalukila dyèndè dyà mu diipaciibwa dyà mu cisanga cyà Paatèmò.

61 Mpindyewu, kùdi kanungu kàmwè kàà pabwàkù kàndi muswè. . . (Ngeela meeji ne mbuumushe wanyi. . . mbòdi awu, kàdi. . .) Ndi muswè kusùminyinapù ndambù kumpàla kwà twètù kulenga bwalu bunène ebu. Kaa, eci's ncyà butùmbi be! Nshapità wa wenza mulòwù, mulenga mulaya.

62 Ne pashiishe nshapità mene udi ulonda ùdi utwadija ne dikangula dyà bitampì. Kaa, ekèlekèle! Ne pashiishe nebikèngele bwà twètù kubáfukila apu kuya mu myaba mishìilangane mu Bible, bwà kufika ku bitampì ebi pàdìbi bikànguka ne cidì maalu masokoka ààbi. Kaa, s'mbyà butùmbi be, ànu bibanjike ne vitamines yà nyumà's wè!

63 Mpindyewu, tudi tumòna ne bùmwè bwà ku maalu manène à pabwàwù búndi njinga kukòkelapù ntemà yènu, bùvwa Bifùkùibwà bidì ne mwoyi (byà mu citùpà cyà ndekeelu cyà nshapità mwi4) byàkamòna Yone biikale bilama Mushèètè wà Cipungidi awu. Nudi nuvùluka mùshindù ùvwàbi bitèèkiibwe ànu mùvwa Izaàlèèlà mu lwendu lwèndè anyi? Mpindyewu, muntwamu, bivwa ne, kùvwa mpàla wà Cifùkiibwa cidì ne mwoyi. Nènku tudi tujandula ne Bifùkiibwà ebi kabìvwa Banjèlò to, anyi kabàvwa bantu to. Bàvwa Bakèlùbà. Nènku tudi tubàsangana mu Dipungila Dikùlukula ne mushèètè wà cipungidi. Tudi tubàsangana mu Dipungila Dipyadiipya. Ne pashiishe tudi tubàsangana kàbìdi mu Dilwa dyà Mukalenge, Bakèlùbà bàlama nkwasà wa ngàsà.

64 Nkwasà wa ngàsà kùvwà muntu nànsha kàyì mwà kuseemena pàvwaku kakùyì kwanji kwenjiibwa difuta dyà cibawu bwà muntu awu to, mùshindù umwèpelè ùvwàbi mu mwaba wa cijila. . . Pàvwabo bamumyamina mashi, díbà adi ùvwa ùlwa nkwasà wa ngàsà. Kàdi paanyimà pàà mashi mamane kuumushiibwapù, díbà adi ùdi ushààla nkwasà wa cilumbulwidi.

65 Nènku, kaa, ekèlekèle, muntu nànsha umwe kàvwakù mwà kutwàla manyooka à Nzambì to. Cintu cimwèpelè citùdi mwà kukeba ngàsà, kí ncilumbulwidi to, kí mbwakàn-. . . bwakàne to. Katwèna mwà kulenga bwakàne Bwèndè to; bwalu, bwakàne Bwèndè, Yèyè neikale ne cyà kulama Dìyì Dyèndè; ne kulama Dìyì Dyèndè ne: “Ditùkù dinwàkùdyà, ditùkù adi nenùfwe.” Nganyi udikù mufwànyine kuswa bwakàne? Ncyèna muswè

bwakàne to. Ndi ndòmba luse. Ekèlekèle, luse lwà Nzambì. . .
Ne nkwasà wa ngàsà mmumyamina mashi!

66 Kàdi kùvwa cikondo cyà dikezudiibwa dyà mwaba wa cijila, pàvwàci nkwasà wa cilumbulwidi musangu wònsò ùvwa mashi kaàyì pa nkwasà awu to.

67 Mpindyewu, tukààdi tuseemena ku cikondo aci *mpindyewu*. Tudi munkaci mwà kuseemena, mu cikondo eci, ku dikezudiibwa dyà mwaba wa cijila ne manyooka àlwalwà pa buloba awu. Nwamònu anyi? Pàcidiku ànu Mashi mwaba awu, Nzambì kèna mwà kubùtula buloba to; pàcidipu ànu Mashi, muntu nànsha umwe kèna ngènzàmpèkààtù kumpàla kwà Nzambì to. Bantu bwònsò bàdi ànu bìmpè, bwalu kùdi Difuta dyà cibawu bwà bantu bwònsò. Kàdi wèwè mupangè kwitaba Difuta dyà cibawu adi ne kubwela mu Bwikadi Bwèndè, díbà adi paùdi ngènzàmpèkààtù, udi muye dyàmwàmwà dyà luse alu. Apu kaayi udi mudipiishe nkààyebè. Kàdi mpindyewu pàcidiku luse apa. . . Kàdi pàdi dikezudiibwa dyà mwaba wa cijila dilwa, Mashi àdi ùmuka pa nkwasà wa ngàsà nènku díbà adi ciiji cikolè cyà Nzambì cìdi cìpona pa buloba. Kaa, ekèlekèle! Nzambì ìkalèku neetù luse, bwà ne katùlukù kusanganyiibwa mu ditùkù adi bapangile luse lwà Nzambì to.

68 Mpindyewu, tudi tumònamù. . . nènteeteku mùshindù wà kucìvwija cyà nyumà mwab'ewu, anyi kunùzòlelaci ne byanza byànyì, bwà ne kùvwa ntengu yìnaayi mùshindù ùvwa beena Izàlèlèlà bààsa citùùdilu cyàbò. Bàvwa batèèka mu—mushèètè wà cipungidi munkaci, ne mu nseke yìnaayi yà ntentà amu mùvwa bisàmbà bisàtù byà Izàlèlèlà, ne isatù kuvudija ku ìnaayi n'dikumi ne ìbìdi, anyi ìnaayi misangu yisàtù's we, dikumi ne ìbìdi. Ne bisatù kàna byònsò abi bìvwa ne mfùmù. Ne mfùmù yònsò wa cisàmbà. . .

69 Umwe wa kùdibo ùvwa Luubènà, ùvwa misangu yònsò ànu wàsà citùùdilu ku—ku sud. Yèyè nguvwa mutù wa muntu. Ne Efàlàyimà ùvwa ku wesètè, ne bisàmbà bisàtù, yèyè ùvwa n—ngombe. Kùdi. . . Pashìishe ku esètè kùvwa Yudà, uvwa mwikale nyama wa ntambwe. Ne ku nord kùvwa Dan, ùvwa mukankù. Mpindyewu, mònaayi. Nudi babàvùlùke anyi? Bwònsò bwènù nudi babàvùlùke bìmpè, mutùvwà babizòle mwab'ewu: mukankù, ne ngombe, ne—ne muntu, ne nyama wa ntambwe.

70 Mpindyewu, nudi numòna's, Yudà ùdi ùlama ciibi cyà ku esètè. Ne Kilistò ùdi “Ntambwe wa cisàmbà cyà Yudà.” Yèyè neatùùlikile mu mauulu à ku esètè, ubwelelamù mu njila wa ku ciibi. Yèyè ùdi ùfùmìna ku ciibi cyà ku esètè ùfùmìna ku cisàmbà cyà Yudà. Ne Yèyè ùdi “Ntambwe wa cisàmbà cyà Yudà.”

71 Nènku tudi tujandula ne, mu diyiiisha dyètù didì dilwa mu dindà emu, ne Yèyè ùcidi ànu wàmba patòòke ne “Ntambwe wa cisàmbà cyà Yudà, Muji, cibangidilu mene cyà Davidi.” Davidi

ùvwa mfùmù, Cyendèlèlè. Ne Kilistò ùdi ùsòmba pa nkwaswa wa butùmbi wa Davidi mu Bukalenge bwà bidimu cinunu, mwikale Mfùmù wa Cyendèlèlè. “Davidi kàakupangilaku mupinganyi nànsha.” Àlèluuyàh! “Davidi kàakupangilaku mupinganyi nànsha!” Nzambi ngwakalaya aci, kwamba ne: “Davidi kàakupangilaku mupinganyi nànsha, nànsha kakesè.”

⁷² Wèwè udi wamba ne: “Kadi bishi bwà leelù ewu, balumbulwishi bàà beena Yudà abu bèpì?”

⁷³ Yèyè ùcidi ànu ne Dimiinu, Kilistò ùdi Mwan'Èndè bilondèshìle mubidi. Kùdi mukwàbò musòmbe mwaba awu. “Davidi kàadyakupangilakù mupinganyi nànsha.” Ncyà bushùwà. Ne Kilistò ngudi “Ntambwe wa cisàmbà cyà Yudà” awu kùdi Davidi mufùmine.

⁷⁴ Mpindyewu, tudi tujandula ne bàvwa balami bàà ku nkwaswa wa ngàsà. Bàvwa bàtàngila nkwaswa wa ngàsà. Cintu nànsha cimwè kacivwà cifikaku to, civwa cisabuka bisàmbà abi dyàmbedi kumpàla kwà kufikaci ku nkwaswa wa ngàsà awu. Muntu yònsò ùvwa witaba bwà kufila mwoyi wèndè, dìnà mwena Izàlèlèlè yònsò mu kampònyì ùvwa witaba kufwà kumpàla kwà ní ncinyi ní ncinyi kubwelaci mu kampònyì amu bwà kwangata nkwaswa wa ngàsà awu. Nènku mpindyewu tudi tujandula ne civwa mbulondyanganyi bwà Dipungila Dikùlukulu.

⁷⁵ Nènku mu bulondyanganyi bwà Dipungila Dipyadipyà tudi tusangana cintu cimwècimwè aci, cyà ne, nkwaswa wa ngàsà awu ùvwa mulama. Kaa, ndi ntèkemena ne nudi nucyùmva! Nkwaswa wa ngàsà ùcidi ànu mulama, mucikàle ànu ne balami. Tudi tujandula ne balami abu bàdi Maatàayi, Maakò, Luukà, ne Yone, balamè Mukàndà wa Byenzedi, byenzedi byà Nyumà Mwímpè byenza munkaci mwà bàpostòlò, cidi—Mukàndà wa Byenzedi Bipyabìpyà byà Dipungila Dipyadipyà. Ne bafùndi bànaayi bàà Èvànjeeliyò ayi, Maatàayi, Maakò, Luukà, ne Yone, bwònsò mbalama nkwaswa wa ngàsà awu bwà kuleeja ne n'Nzambi, Nyumà Mwímpè leelù ewu. Mufùndu wònsò, Maatàayi, Maakò, Luukà, ne Yone, yònsò wa kùdìbò neàtwè mpàndà ku Èvànjeeliyò mulelèlè wa Mukalenge Yesù Kilistò ne byenzedi byà Nyumà Mwímpè.

⁷⁶ Mpindyewu, patùdi tufika dyàmwàmwà dyà Aci dìbà adi kí n'Yèyè to. Kàdi Udi ùtwà Mukenji mulelèlè nyama ku mikolo! Mutùdi tusangana mu Byenzedi 2:38, mùdibi ne: “Nyingàlalaayi, nubàtijiibwe mu Dìnà dyà Yesù Kilistò bwà dilekelediibwa dyà mpèkaatù yènù.”

⁷⁷ Nènku leelù ewu mbangàte Dìnà dyà “Taatu, Mwànà, ne Nyumà Mwímpè” bwà kubatijiibwamù. Kakwènakù Mufùndù bwà cyòci aci to! Kakwèna mwaba wa kushìndamijilabo bidìbò bàmba to. Kakwèna—kakwèna cintu nànsha cimwè bwà kulama cyòci aci to, cintu nànsha cimwè! Wèwè udi wamba ne:

“Maatàayi ngudi mucyambè.” Maatàayi mmuWulamè. Maatàayi 28...1:18 mmwambè ne:

... dilediibwa dyà Yesù Kilstò òwà mu mùshindù ewu: Pàvwà...mamwëndè Màriyà mubangila kùdi Yözefù, kumpàlà kwà kusangilabò pàmwè, wàkasanganyibwa ne òwà dyà Nyumà Mwîmpè.

Eci cyònsò cyàkenjiibwa pàvwà...Yözefù bayendè, (èyowa's) *mwikale muntu mwakàne, ...kayi muswè bwà kumufwisha bundu, wàkeela meeji bwà—bwà kumulekela mu musokoko, mu mùshindù ewu.*

Kadi pàcivwàye wèlangana meeji pa maalu aa, mònaayi, mwanjèlò wa Mukalenge wàkamumwènekela mu cilòòtà, wàmba ne: Yözefù, wèwè mwànà wa Davidi, kùcìinyi bwà kwangata Màriyà mukàjèèbè pàmwè neebè to, bwalu cidìye mwimite munda mwèndè aci ncyà kùdi Nyumà Mwîmpè.

78 Dìbà adi, Nyumà Mwîmpè ne Nzambì Taatù m'Muntu umweumwe awu cyanààna Ùvwa ne baataatù bàbidì. Nwamònu anyi? Pa nàнку nudi numòna's!

Ne yéyè neàlelè mwànà, ... àmbùkìlè òwà dyèndè ne YESU: ...

... nènku eci kwenzeka, bwà kumòna mwà kuuja ... cyàkaakulàbo kùdi ... mupròfeta, ...

79 Nzambì ùvwa mwà kwikala neetù, bàmbiikila ne Èmanùwèlè, udi Nzambì awu, Taatù, Mwànà, ne Nyumà Mwîmpè, mu Dìna òmwèpelè (Yesù Kilstò) didi dilama ciibi bwà cilemà kacýenzeki.

80 Kùkaadi ndambù wa matùkù mu Chicago, kumpàlà kwà kasumbù kàà bambi kàà mu Chicago, Chicago mutàmbe bunène awu...Mvwa mumanyè...Nyumà Mwîmpè kunkàtamuna ku tulu butùku ne kungambila ne: “Imànyina lwà ku dididiishi.” Yéyè ne: “Kùdi kasumbù kàà bambi ne bàdi bakulongolwela cyàkudyà cyà mu dindà.” Yéyè ne: “Wadimuka, nebàkubùndùlè pa bwalu ebu.”

81 Mémè ne: “Twasàkidila, Mukalenge.” KundeejaYè mwaba ùvwaci mwà kwenzekela.

82 Ki mémè kuya kambila bambi kampànda, Mwanèètù Carlson ne Mwanèètù Tommy Hicks, mùshindù mwinè ùvwabi bifwànyine kwikala. Mémè kwamba ne: “Mwaba unùdi balòmbeshe awu, kabyàkwikala nàнку to. Netwikalè mu mwaba mukwàbò.” Kumwambila mùshindù ùvwà Docteur Mead mwà kwikala musòmbe; mùshindù ùvwà muntu kampànda wa bafìke mwà kubwela, kusòmbe mùshindù *kampànda*; ne byònsò pa bwalu abu.

⁸³ Pashùishe mu dindà adi, ki kwambabo. . . Mwanàànyì wa balùme kungambilaye, yêyè ne: “Papa, uyààya kuntu kwaka mu makòkyanganyi awu amu anyi?”

⁸⁴ Ki mêmè kwamba ne: “Ncyàkuyamù bwà kukokangana to. Ndi nyamù, mulaabùbwe kùdi Nyumà Mwîmpè, mwikale ne Dìyì dyà Nzambì diikala mwà kulama nkwasà wa ngàsà awu, pàcidiYe ànupù.”

⁸⁵ Nànku patwàkafika kuntwaku, bangabanga mene ne kupetabo mpùngà wa kukonka cintu nànsha cimwè, Nyumà Mwîmpè ùkaavwa mwakule naanyi, wàmba ne: “Mpindyewu ki cikondo cyà kucyàmba ncyàci.”

⁸⁶ Mêmè ne: “Ndi mumanyè bwà cinyi nudi kaaba aka.” Ki mêmè ne: “Mpindyewu, Mwanèètù Hicks, ne wèwè ne Mwanèètù Carlson, mutàngidi wa beena Kantu-ku-byanza bàà beena Kilistò,” Mêmè ne: “bintu byònsò kabyèna ànu menemene mùshindù ùvwà Nyumà Mwîmpè mungambile màyipi wàwa anyi? Bwà ne kanwèna bapete cibambalu aci to, ne netwìkale lwà mwab’ewu anyi?” Nènku ki kucipetabo ànu mu dindà amu. Ki mêmè kwamba ne: “Mpindyewu tàngilàayi, muntu yònsò nyèwù mutèèkùbwe ànu mùshindù ùvwàYe mwambe ne nebùikale awu.” Mêmè ne: “Cintu cinùdi baswè kunkonka mbwà dibàtiiza mu Dîna dyà Yesù Kilistò.”

⁸⁷ Nènku patùdi. . . Nyumà Mwîmpè kubanga kwangata Dìyì dyà Nzambì ne kuDibuulula ne kuDyumvwija mùshindù awu, mpàvwà musumbà mujimà wa bambi bàà ba-trinitaires abu basòmbe mwaba awu, bwòlwelangana byanza mwinshì mwà mèèsà ne bàlabulangana ku byanza muntu ne mukwèndè ne binsonji bibàpwekela pa matàma. Ne ndi muumvwe ne makumi mwandamutekète ne bàbidi bàà ku bòbò nebàpweke kuneeku ku tabernacle eku bwà mêmè kubàbàtiiza mu Dîna dyà Yesù Kilistò.

⁸⁸ Nkwasa wa ngàsà mmulama, nwamònu’s, Nyumà Mwîmpè munkaci mwà kulama nkwasà wa ngàsà. Tudi ne cyà kucilama ànu menemene. . . Dìyì dyà Nzambì adi. . . baamisànjeela banène abu basòmbe mwaba awu, Maatàayi, Maakò, Luukà, ne Yone, bàdi bàshindika cyenzi cyònsò cyà Dipungila Dipyadipyà.

⁸⁹ Nènku mpindyewu—mpindyewù, aci ki menemene címvwà mwàmbe mu citupà cyà kumpàla cyà diyiisha dyà mu dindà emu, tucilamàayi ànu mwaba awu cilama kùdi Èvànjeeliyò. Nudi numòna anyi? Nwamònu anyi? Cilamàayi ànu mwaba awu ùdi Èvànjeeliyò ayi miCilamè.

⁹⁰ Mpindyewu, tudi tusangana muntwamu ne, bàvwà bàlama nkwasà wa ngàsà wa Nzambì mu Dipungila Dikùlukulu; ne mwômò amu, Maatàayi, Maakò, Luukà, Yone, bwònsò bwàbò. Ne nànsha mene Ntambwe wa cisambà cyà Yudà wàkatèeka mwoyi Wèndè panshi bwà kulama nkwasà wa ngàsà awu, ikale mummyamina kùdi Mashi Èndè Sungasunga. Nènku ki Yèyè awu

mwimane mu dindà emu, leelù ewu, Mucimunyi munène wíkala mwà kupwekela ku Esètè dimwè ditùkù ne twètù netùMumònè.

⁹¹ Mpindyewu, tudi tubuulula lùkàsàlùkàsà, bwalu ndi mumanyè ne kùdi mudimu wa dibàtiiza. Mukàndà mutwà Bitampì mwandamutekète ewu ncinyi? Kaa, cintu cinène kaayìpu's wè! Nuvwakù bamòne mùdìbi byàmba apa ne: "Cìvwa bitampì mwandamutekète *paanyimà* pàà Mukàndà anyi?" Ncintu kampànda . . .Kaa, Nzambì àtùkwàcisheku mpindyewu ne àtupèesheku bukìtù, nènku pàmwàpa nànsha ku tootooto anyi ku ndandanda ndi mwà kunùumvwijaci. Tàngilàayi, eci kì ncifùnda mu Dìyì to, ncitwibwe citampì paanyimà pàà Dìyì. Mukàndà ùvwa mutwibwe citampì kùdi bitampì mwandamutekète ebi. Bwalu busokoka bwònsò nkòong bwà Mukàndà mbutwibwe citampì mu bitampì mwandamutekète ebi. Ewu ki umwe wa ku nshapità mitàmbe bunène mu Mukàndà wònsò nkòong wà Bwàkabuulwibwà. Tàngilàayi:

Nènku ngàakamòna mu cyanza cyabalùme cyà ewu uvwa musòmbe pa nkwasà wa butùmbi mukàndà mufùnda munda ne . . . mufùnda munda (Munda mmufùnda, ki citùdì tubala mu dindà emu.) ne . . .paanyimà, mutwa citampì ne bitampì mwandamutekète.

Pambèlu pàà Bible apu, cìdì Bible kàyì nànsha wàmba to, ncitwa citampì munda emu ne bitampì mwandamutekète: maalu masokoka à Nzambì.

⁹² Mpindyewu, ncinyi aci? Mpindyewu, mònaayi. Cìtampì cìdì cìleeja cintu cijikija, cintu kampànda cìkaadi cimana kuteeta, cijaadika, ne pashiishe citwà citampì. Mpenyì pàdì . . .Tudi ne ceyè cyà lupàndù lwètù mpindyewu ku ditwibwà dyà citampì ne Nyumà Mwìmpè. Ki ceyè cyà lupàndù lwètù ncyòci aci.

⁹³ Twanjàayibi kwalukila paanyimà kakesè. Ndi—ndi ne Mufùndu mufùnda mwab'ewu, yàbùngì mene, ncyèna . . . ncyàkupeta dìbà dyà kuyilenga yònsò to. Kàdi twàlukilàayibi mu Efèsò, katanci kakesè cyanàànà, bwà kubala . . .mu nshapità wa 1 wa Efèsò, bwà nwamòna mwà kupeta dyumvwija dilelèlà.

Pòlò, mùpostòlò wa Yesù Kilistò ku diswa dyà Nzambì, kùdi bansantu bàdì mu Efèsò, . . .

⁹⁴ Nènku, vùlukàayi ne, Yone wàkafùndila beena Efèsò mukàndà ewu, ku Efèsò ne beena lulamatu mu Kilistò, aba bàdì Pòlò muyiishe ne mukoleshe, mudiishe ne Èvànjeeliyò. Nwamònu anyi?

. . .Efèsò, ne kùdi beena lulamatu mu Kilistò . . .

⁹⁵ Aba mbàkaadi mu Kilistò. Mmunyì mutùdi tubwela mu Kilistò? "Ku Nyumà umwe ncutùdi bwònsò babàtiijibwe mu Mubidi wùmwè," wùdi Mubidi wa Kilistò awu.

Ngàsà ikalè kunùdi, ne ditalala, byà kùdi Nzambi Taatù wetù, ne... Mukalenge Yesù Kilistò.

Nzambi ne Taatù wa Mukalenge wetù Yesù Kilistò àbèneshiibwè, yèyè udi mutubèneshe ne mabènesha ónsò à nyumà mu myaba yà mu dyulu mu Kilistò Yesù:

96 Anji elààyibi meeji ku bwalu abu mpindyewu! Yèyè mmutubèneshe ne ngàsà yónsò wa mu dyulu, mabènesha, patùdi badisangishe mu Kilistò Yesù (bu beena kwitabuuja, Èkèleeziyà musungula, mubiikidiibwe bwà kupatuka, mutèèka ku luseke). Mmutútwe mù citampì ku Nyumà Mwimpè Wendè, nènku mpindyewu ùdi munkaci mwà kutùbuulwila maalu àcilwalwà bwètù. Mpindyewu tukàadi ku bitampì mwandamutekète.

Bilondèshìle mùdiye mutusungùle twètù munda mwèndè kumpàlà kwà difùkà dyà dyulu ne buloba, bwà twàmòna mwà kwikala bàà cijila ne katuyi cyà dibandùbwa naaci... mu dinanga:

Mudyànjàle kutùlongolola ku ditèèkiibwa dyà bàna kùdi Yesù Kilistò kùdiye yèyè mwinè, bilondèshìle disànkà dimpè Dyèndè Sungasunga... .

97 Eci mmeeji malengapù kaayi's wè! Tutùngunukàayi ànu ne kubala katanci kakesè. Ndi muswè kupweka kaaba aka nangananga ku mvensà wa 12, ne wa 13, wa 14:

Bwà twìkaleku ku disàamunyiibwa dyà butùmbi bwèndè, twètù bàakadyànjàla kumweyemena Yèyè.

Mu yèyè munwàkeeyemena kàbìdi, paanyimà pàà nwènù batèèleje dīyi dyà bulelèlè, ne évànjeeliyò wa lupàndù lwènù: mu yèyè... paanyimà... nwènù biitábùuje, nwènù kutwibwa citampì ne Nyumà mwimpè wa mulayi,

98 “Paanyimà pàà nwènù bamane kwitabuuja.” Kaa, mwanèètù wa ba-Baptistes, mmunyi mùdiku mufwànyine kwamba ne Aci kī mmwòmò nànsha? Wèwè udi wamba ne udi upeta Nyumà Mwimpè paùdi witabuuja anyi? Bàakamba ne: “Paanyimà pàà wèwè mumanè kwitabuuja díbà adi wèwè uvwa mutwibwe citampì ne Nyumà Mwimpè wa mulayi.” Mònaayi:

Udi mwikale cyeya cyà bumpyànyì bwètù too ne ku bupikudi bwà bìdi bu byètù bipikula, bwà kutùbweja mu butùmbi bwèndè.

99 Mpindyewu, tudi tujandula díbà adi ne citampì cidi cyùmvwija ne “ncintu cijikija kùdi Nzambi, cìkaadi cimana kulongolola.” Nènku mwena kwitabuuja yónsò ùvwa mutwibwe citampì ne mulayi kacya ànu ku cibangidilu mene aku, bwalu kumpàlà kwà difùkà dyà dyulu ne buloba tuvwa badyànjàla kulongolwela ditèèkiibwa dyà bàna. Kumpàlà kwà buloba kubangabù! Kaa, ditèkemena kaayipù's wè! Aci's cidi citwikishisha bashimate ne batwishiiibwe's. Lwongo bwà

musùukà ùdi kawùyi mutakankaja eku ne eku, kàdi mwele lwongo mu Kilistò, ditèkemena dyà ditwìshìibwe. “Mudyànjile kutùlongolola kumpàlà kwà difùkà dyà dyulu ne buloba, bwà ditèekiibwa dyà bânà bàà balùme kùdi Yesù Kilistò.” Kaa, bilenga be! Ndi munange aci cyà ne: “mudimu mujikija” kùdi Nzambi.

¹⁰⁰ Mpindyewu, ndekelaayi nnùtèèlèleku mukwàbò Mufundu. “Bwònsò bàakadyànjlàYe kumanya, Yèyè wàkabàbiikila; bwònsò bàakabiikilàYe, Yèyè wàkabàbingisha; bwònsò bàakabingishàYe, Yèyè wàkamana kubàtùmbisha.” Kubangila ànu ku cibangidilu, Nzambi, mu meeji Èndè manènè à kaayi mikàlu awu, wàkadyànjlà kumòna Èkéleeziyà Wendè ne kucìlongolola ku ditèekiibwa dyà bânà ku Yesù Kilistò, bwà kubàpèèsha Mwoyi wà Cyendèlèlèlè ku ndekeelu kwà cikondo. Cintu cilenga kaayipu’s wè! Mwanèètù Neville, aci’s cidi ànu cyenza ne ntambe kudyùmva bîmpè bikolè. Kàdi wèwè? Kaa, èyowà. Ditèekiibwa ku Mashi à Yesù Kilistò!

¹⁰¹ Mpindyewu, mònaayi patùdi tutùngunuka apa. Mpindyewu, tudi bamanyè ne cidi ndijikij-. . .Tudi badyànjlà kulongolola pàmwè ne Mwànà wa mùkòòkò. Nyumà Mwîmpè ùdi Cítampi cyètù. *Cyeyà* mbwena kwamba ne “bikwàbò bicilwalwa.” Tudi ànu ne cyeyà cyà Cyôci aci mpindyewu. Cyeyà cidi ànu mushinga mudyànjlà kufuta (Kaa, mùshindù ùdibi bilenga’s wè!), ànu mushinga mudyànjlà kufuta ùdi mucilame ne ùcikuba ne ùcìshindamija mu mùshindù wà ne muntu nànsha umwe kèna mwà kucilenga to. Ki cyeyà cyà ditèekiibwa dyètù ncyôci aci. Amen. Nyumà Mwîmpè ùdi mpindyewu cyeyà cyà Nzambi mu myoyi yètù (batwibwe cítampi), ditèekiibwa dyà bânà nditwindile ku ndekeelu kwà njila. Bânà bàà balùme ne bàà bakàji bàà Nzambi!

¹⁰² Tuyaayi ku Mufundu mukwàbò, ne lukàsà lwònsò, ndi naawu mufunda pa dibèji edi mwab’ewu. Loomò 8:22, ngeela meeji ne ncilenga be. Mpindyewu, mu kulonga makèèlèlèlè awu, mvwa bu mvwà mufundè ndambù wa Mifundu mwaba ewu yîndi muswè bwà kwikala kutàpakù dîsù.

*. . .tudi bamanyè aci—tudi bamanyè ne bufùki bujimà
bùdi bùtwa mikèmu ne mu bisaamà byà pa kulela
pàmwè too ne mpindyewu.*

*Nènku kî ànu bóbù nkààyaabò to, kàdi ne twètù pètù,
bàdi ne misòmù yà Nyumà, ne twètù bîinè pètù tudi
tutwà mikèmu munda mwètù, bindile bwà ditèekiibwa,
bwà kumanya, bupikudi bwà yètù mibidi.*

¹⁰³ Kaa, nudi nucimòna anyi? “Bufùki bwònsò bùdi bùtwa mikèmu,” mwàkambà Pòlò. Bintu byònsò bìdi munkaci mwà kutwà mikèmu. Tàngilàayi micì mùshindù udìyi yilwangana. Tàngilàayi bilòngò mùshindù ùdibi bilwangana bwà mwoyi; ànu bwà mashika makolè kulwawù kubishipa. Tàngilàayi micì

mùshindù ùdiyi yilwangana bwà kulaminyina matàmbà ààyi bwà kwimba matùmbi kùdi Nzambi. Nwamònu anyi? Bintu byònsò, bufùki bwònsò, nyama yònsò, nyuunyi yònsò, mùshindù ùdiyi yibàfuka mulwishi lukàsà ne yibùuka, bintu byònsò bìdi munkaci mwà kutwà mikèmu. “Ne twètù biine,” mwàkamba Pòlò, “tutwàtwa mikèmu, pèètù, pàmwè naabi, bwalu tudi bindile dipikudiibwa dyà mubidi wètù.”

¹⁰⁴ Kàdi *mpindyewu!* *Mpindyewu!* Bààkenza nàнку bidimu byònsò abi too ne *mpindyewu!* *Mpindyewu* tudi ne cyeyà cyà bumpyànyi bwètù! Kaa, ekèlekèle! Citùdi naaci ncinyi? Tudi ne cileeeji cyà ne Nzambi ùdi ne mwoyi. Tudi ne cileeeji cyà ne Nzambi ùdi neetù. Tudi ne cileeeji cyà ne Nzambi kí mmutùlekèle to, bwà ne tudi Bèndè ne Yéyè ngwetù, bwalu tudi (mu mibidi yètù), twètù mpindyewu tudi babwikile Nyumà Mwîmpè wa Nzambi udi wela lubila ne: “Abba, Taatù.” Ne kakwèna cintu nànsha cimwè cidì mwà kuumusha aci to. Tudi beelè lwongò mu Kilistò.

¹⁰⁵ Mpindyewu, micì yôyi kayèna naaci to, bufùki kabwèna naaci to, kàdi nànsha nàнку tucidi ànu tutwà mikèmu pàmwè naabi bwalu katwèna ànu banji kupeta kaabujimà kàà ditèèkiibwa dyètù nànsha. Kàdi tudi ne cyeyà cyàdi, cyà ne tudi balamùnyibwe ku bintu byà pa buloba ne mpindyewu balwè bàna bàà balume ne bàà bakàji bàà Nzambi. Tuvwa ne cyà kwikala bantu bàà mùshindù kaayi? Kaa, ekèlekèle, patùdi twela meeji ku cyòci aci! Anjì elààyibi meeji ku bwalu abu!

¹⁰⁶ Mpindyewu tudi ne cyeyà, nyumà wetù ùdi munkaci mwà kutwà mikèmu bwà ditèèkiibwa, kàdi mpindyewu tudi ne cyeyà cyàdi. Patùdi tupeta Nyumà Mwîmpè, kí cyeyà cyà ditèèkiibwa dyètù mu kaabujimà anyi lupàndu mu kaabujimà. Kaa, bilenga be! Ndi munange aci. Eyo.

¹⁰⁷ Tudi bindile kaabujimà kàà ditèèkiibwa. Eci necyènzekè díbà kaayi? Ku dibìikà dyà ku lufù dyà kumpàla. Kí díbà adi díikala mibidi yètù ne cyà kushintuludiibwa kuumuka ku bifùkiibwà byà bishàádile bitùdi ebi ne netwikalè ne mubidi mufwànàngane ne mubidi Wèndè Sungasunga wa butùmbi ne: “Bwalu netùMumònè mùdiYe, ne netwikalè bafwànàngàne Nèndè.” PàdiYe ùmwènèka, tudi tumweneka bafwànàngàne Nèndè. Netwikalè ne mubidi bu Wèndè, mubidi wà butùmbi mutùmbishìibwe awu, ne ntàtu yònsò ne mvità byà mwoyi nebìjimìne bikabwele mu kaadibungi kakesè ne kutangalaka bwà kabìciyi kàbìdi mwà kwikalakù to.

¹⁰⁸ Ne nntèntà yà pa buloba mutùdi tutwila mikèmu emu eyi, tudi bindile cyeyà aci—cyeyà aci. . . bwà dikumbana dyà lupàndu mu kaabujimà kààlù kulwalù. Kàdi mpindyewu mu nntèntà yà diima eyi tudi ne Cikampànda cidì citwambila ne tukàadi bamane kubiika ku lufù. Amen. Cyeyà ncinyi? Mmushinga mukesè mufuta ùdi mucilame, Mwanèètù Dauch. Kí cyeyà

aci's. Mpindyewu, musangu kampānda tuvwa banangè maalu à buloba, musangu kampānda tuvwa twenza mpèkaatù ne twenda twenza bintu byà pa buloba, ne katùyi tucyùka Nzambì, tuvwa kule Nendè, katùyi Nzambì, katùyi Kilistò, mu buloba emu; mpindyewu, Nzambì wàkatùma Nyumà Mwímpè Wendè ne ku cyòci aci tudi babāndishìibwe kumutù kwà bintu abi. Tudi mpindyewu ne cyeyà, cyà ne tudi bamanyè ne tudi buumuke ku lufù bayè ku Mwoyi. Amen!

¹⁰⁹ Mwaba ewu, ànu mûmvwà nteeta kuleeja eci mùshindù ewu. *Mwab'ewu* ki ùdi ngènzàmpèkaatù yònsò ewu wèndela, lwà mwinsi menemene emu. Mpindyewu, mwena Kilistò ùdi ùbānda ndambù kutambidila ewu, ùdi ùbānda kumutù kwà cintakanyi cyònsò aci. Ki cyeyà cyà lupāndù lwèndè ncyòci aci.

¹¹⁰ Mpindyewu, bwà nwamòna mwà kumanya dîbà... cidi bikèènà-kumòna binwènzela. Nānku ndi ngambidilamù, Nzambì ki mulumbulwishi wanyì, ncyenāku ne dijinga dyà kupeta cikwābò to. Bu mēmè mwà kucipeta, nēncilamine bwānyì nkāāyanyi, nwamònu's, bwalu ndi mmòna cìdici cyènza. Bantu kī mbadilongolole bwà mudimu wà bwambi bu nānku to, nānku awu mbímpè ànu kubilekela, nudi numòna's, kwalukila kaaba aka. Kādi bu mēmè mwà kulwa cyākābidi mu budimi bwà bwambi, nēngiikalè mutangadiki. Kādi tångilāayi kuneeke. Pa eci nūnku, mu kwalukila mu eci nūnku, lwà muulu emu, nudi nubānda nukabwela mu byà mu Dyulu lwà muulu emu. Udi usòmbela ànu lwà mu bipaapu abi amu. Udi uya dyāmwāmwà dyà cintu kàna cyònsò cidi muntu mwà kwelela meeji, dyāmwāmwà dyà cintu kàna cyònsò cyà ku bintu abi. Nēnku bìdi bikufikisha mu myaba yà muulu ayi.

¹¹¹ Kādi, nudi numòna's, mpindyewu tudi ne, ku Nyumà Mwímpè, cyeyà cyà bumpyānyì bwètù bwalu tudi babāndishìibwe kumutù kwà bintu byà pa buloba; ne tudi twendela pa buloba, kādi tudi kumutù kwà buloba! Éyì Mwanèètù Neville, Nzambì ikalèku ne luse ne àpèèshèku Èkèleeziyà wa Nzambì udi ne mwoyi...

¹¹² Patùdiku tukafika pa kaaba kàa kwela meeji ne èkèleeziyà, èkèleeziyà mulenga kumòna, ne: "Tudi tuteeta kwikala ne cisumbù citāambe bwímpè cyà basketball citāmbidile cìdibo naaci. Bikèngela twikale ne nzùbu mu—mutāambe bwímpè. Bikèngela twikale ne dinaya dyà bunco ditāambe bwímpè. Bikèngela twikale ne *cikampānda* ne *cikansanga*, anyì *cikankènga*." Mòna's, mmunyi mutùdi mwà kuCipālakaja ne dibālakana ne dyengelela dyà buloba? Katwèna... Èvānjeeliyò kī *ndyengelela* to; Udi *ditwà dyà nsesè*. Kùdi dishìilangana pankaci pāa dyengelela ne ditwà dyà nsesè.

¹¹³ Nwamònu's, tudi ànu tunyunguluka, byenze bu mûmvwà mwambe, twangata citālù cīmwe—cīmwe ku ewu nzùbu wa

bitàlu kuya naaci ku mukwàbò, tushintakaja bidimba ne bikwàbò byà mùshindù awu. Èè, bidi ne dikwàcisha kaayi kutùdi? Kàdi tudi tuteeta bwà ku cìvwija dibàlakana, tùleyi twìmpè tunène, myaba mìmpè minène. “Bikèngela tùpetè citàmbe bwìmpè kutàmbe ba-Méthodistes anyi citàmbe bwìmpè kutàmbe ba-Baptistes, nènku twètù bwònsò tuteeta kutembangana ne beena Kàtòlikè, eku twenza manayi à mubèlè ne mafestò ne didyà ne bisànkasanka, ne bikwàbò byònsò.”

114 Èkèleeziyà kèna mwà kudifwànyikija ne maalu à pa buloba to. Mmunyi mùdiku wèwè ne bisànkasanka byà èkèleeziyà wenù mwà kudifwànyikija ne Diswa dyà ba-Francis-maçon anyi—anyi ní nganyi wa ku bantu bàdi mwà kucyònkomojangana? Abi's mbyàbò bijèngù. Kudìdingi kuteeta bwà kuya mu bijèngù byàbò abi to.

115 Kàdi twètù tudi ne Cintu kampànda cìdìbo kabàyì naaci to! Tudi ne Yesù. Bòbò bàlwe kaaba aka pùikalabò baswè cintu kampànda. Shààla mu Kilistò. Tudi ne Yesù. Bòbò kabààkwikala . . . kabèèna mwà kupeta Yesù to too ne pàdìbo bàlwa apa. Nènku patùdi tuya kwàka nàka, tudi tupàtuka mu bijèngù Byèndè.

116 Kuteeciku kubàlakana to. Elà nsèsà! Nènku kwena mwà kwela nsèsà to, bikèngela ùCilekelè cyelela nsèsà mu wèwè. Wamònu anyi?

117 Kaammunyimùnyì kakesè aku, kakeenà kèèla nsèsà ne bwalu nkaswè kwela nsèsà to; bwalu kàtu *bulelèlè* kèèla nsèsà, kùdi cintu kampànda munda mwàkù amu cìdi cyela nsèsà. Cìdi mu kòkù amu, ncyòci ciine cìdi cìcyenza nànkù, cintu kampànda munda mwàkù amu ciikale ànu cyelela nsèsà mu kòkù amu.

118 Èè, ki mùshindù awu ùdìbi bwà Nyumà Mwìmpè. Kabyèna bikèngela bwà twikale bàà pabwètù, bashìlàngàne, kwikala cikwàbò cintu to, dilekèlèlè ànu cyanààna ne ikala ne nsòmbelu wa difwànà dyà Nzambì ne lekèlè ànu Nzambì ikadilè ne mwoyi munda mwèbè. Aci's necyèlè nsèsà bwà Èvànjeeliyò. Nwamònu anyi? Kì nkubàlakana to; *kubàlakana*, aci's citu cìfikisha tuunsoku ku ditupikila bintu mùshindù awu, cintu cyònsò cìdi cibàlakana eci. Nudi bamanye's, tùtu misangu yònsò ànu tutùpikila cintu kampànda “cìdi cibàlakana.” Kàdi *kwela nsèsà* kùtu “kalolo kapòle polàà, kapòle kàà—kàà Nyumà Mwìmpè.”

119 Mpindyewu tudi bindile dibìikà dyà ku lufù adi. Èè, mpindyewu, nudi bumvwè anyi? Amba ne: “Amen,” wèwè muumvwa, cìndì njinga kwamba ku “cyeyà aci.” [Disangisha dìdi dyàmbe ne: “Amen.”—Muf.] Tudi . . . Tudi—tudi bamanye ne tukàadi bamanè kuumuka ku lufù bayè ku Mwoyi bwalu tudi babàndishìibwe. Tudi babàndishìibwe kì nku twètù nkààyetù to, kàdi babàndishìibwe ku bintu byà pa buloba, bwà kunanga bantu bònsò. Nènku Nzambì mmutùangè, ne tudi bacimanyè.

Nènku tudi tutàngila nsòmbelu yètù ne tumòna ne Cintu's n'Nyumà Mwimpè, bwalu katúcýèna kàbìdì tucýùka bintu byà pa buloba to. Nwamònu anyi? Ki bwalu mbwòbù abu's. Paùcidì ànu munangè maalu à pa buloba anyi bintu byà pa buloba, dîbà adi dinanga dyà Nzambì kî ndyànji kwikala munda mwèbè to. Nwamònu anyi? Kàdi paùdì kumutù kwà byòbì abi, dîbà adi udi mumanyè ne udi ne bumpyànyì bwèbè, nwamònu's, wèwè udi—wèwè udi mu njila mutàngile ku bupikudi bwèbè mu kaabujimà.

¹²⁰ Nènku, mpindyewu, aci kacýàkulwaku to, nudi numòna's, too ne patwìkalà dyàmbedi. . . Dyàmbedi tudi ne cyà kumòna Yesù. Nènku Nwìkala pààlwàYe, dîbà adi netwìkale ne mubidi mufwànàngàne ne mubidi Wèndè ne netwìkale bafwànàngàne Nendè. Èyo.

¹²¹ Mpindyewu, tudi tumòna cintu kampànda cìvwà cijìmine kaaba aka, bwalu Bible mmwambè nàнку, ne, mu Mukàndà emu bwà ne—bwà ne mmutùpikule. Tudi bapikùdìibwe ku cinyi? Ku cikampànda citùvwà ne cyà kwikala bajìmije. Kumpàla kwà wèwè kwikala mupikùdìibwe, kùdì ne cyà kwikala cikampànda kutùdì ne kupikudiibwakù. Ne bumpyànyì bwònsò butwàkadì naabò bwàkamana—bwàkamana kupikudiibwa. Dîbà adi tuvwa ne cyà kwikala ne cintu kampànda musungu kampànda citùdì katùyì naaci mpindyewu to, kàdi cìdì Mwànà wa mùkòòkò ewu mulwe kupikula. Nwamònu anyi? Tuvwa ne cintu kampànda kutùvwà bajìmìnyinekù.

¹²² Mpindyewu mònaayi. Citùdì bajìmije ncinyi? Èè, byàkapèèbwa Adàmà bwà kwikalaye ne Mwoyi wà Cyendèlèlèlè, pàvwàye ànu ùdya ku Muci awu ùvwà ne Mwoyi wà Cyendèlèlèlè. Nènku tudi tumòna kàbìdì ne Adàmà ùvwà. . . yèyè—yèyè wàkapyàna buloba. Ùvwà. . . bu kaaNzambì kakesè pa buloba. Buloba bùvwà bwèdè. Bintu byònsò bìvwa bifidìibwe mu cyanza cyèndè, ùvwà mwà kwenza naabù cyònsò cìvwaye muswè aci. Yèyè wàkabwinyika dìnà, ne wàkabùtwa dìnà, ne kwenza cyònsò cìvwàye muswè aci. Ùvwà bulelèlè mwànà wa Nzambì.

¹²³ Mpindyewu, mu cibùlà, Adàmà wàkajìmijaku mukàndà wà bwena cintu. Wàkabùjìmija ne Sàtaanà kubwàngata. Sàtaanà wàkàngata mukàndà wà bwena cintu. Adàmà ùvwà mwena lulèngù, ne yèyè kààkapikula makenji èndè to bwalu kàvwà mwà kupikula makenji èndè nànsha. Kàdi Sàtaanà, uvwa kàyì mwenabù mu bushùwà, kàdi ki udi naabù, yèyè's ki kaanzambì kàà buloba ebu. Bible ngudi mwambè nàнку. Yèyè ngudi mubwangate. Kì nne bwalu yèyè—yèyè—yèyè ùdi naabù menemene bilondèshila mikenji to, kàdi mmubwangate. Mpindyewu nudi nucyumvwa anyi? Sàtaanà mmubwangate, mmubùlame mu cyanza cyèndè. Lufù lùdì mu cyanza cyèndè, buloba bùdì mu cyanza cyèndè, buloba mbwèndè, ditùnga ne ditùnga dyònsò ndyèndè, ùdi ùlombola ne ùkòntonona buloba bujimà ne bintu byònsò pa buloba. Sàtaanà ùdi wènta nàнку!

124 Kàdi Nzambì twasàkidila katwèna bàà pa buloba to. Nwamònu anyi? Pa nàнку ki—ki bwalu mbwòbù abu's. Nwamònu anyi? Nènku twètù tudi...Ncyèna ngàmba Èkèleeziyà to; yèyè kàtu ùkòntonona Èkèleeziyà to. Yèyè ùdi ùkòntonona maalu à pa buloba. Wàkamba ne bìvwa byèndè, ne yèyè ùdi kaanzambì kàà bàà pa buloba. Yesù wàkamba ne ki cìvwayè, ne bìdi nàнку. “Yèyè ùdi kaanzambì kàà buloba ebu, mmufofòmèje mèsù à bantu,” nzambì wa buloba ebu. Yèyè ùdi Nzambì wa mu Dyulu. Ne patùdi twakulangana apa yèyè kí mmwenabu mùdibi bilòmbiìbwe to. Yèyè kí mmwenabù to.

125 Kàdi yèyè wàkabùjimija . . .ne Adàmà wàkajimija mukàndà wà bwena cintu bwàci, bwà eci, cintàkanyi cyònsò citùdi naaci eci, Mwoyi wà Cyèdelèlèlè ne bumpyànyi bwà buloba. Yesù wàkamba, mu Maatàayi 5 ne: “Dyàkalenga ndyà bapòle bwalu nebàpyane buloba.” Nwamònu anyi? Mpindyewu, katwèna naaci mpindyewu to.

126 Nènku, tàngilàayi, kabùvwa kùdi Adàmà anyi umwe wa ku mamiinu èndè nànsha. Dimiinu dyà Adàmà kakùyì mpatà to dyàkajimija bintu byònsò, dyòdi pààdi. Kí byà ndimiinu dyà Adàmà adi to. Nànsha twètù bateete bwà kulengeja buloba ebu bishi, ne nànsha twètù bateete kwasa nzùbu minène mimpè ne bikwàbò byà bishi, kabùcyèna ànu bwà dimiinu dyà Adàmà to. To, mukalenge. Kí mbwanji kwalukila kùdi dimiinu dyà Adàmà to, to, mukalenge, bwalu Sàtaanà mmubùnyenge mu kaabujimà, mubùlame ne mukàlame naabù. Bushùwà! Bwalu Adàmà wàkabùjimija.

127 Mpindyewu, kaa, ekèlekèle! Èyowà's, bintu bùngì cyanààna bìvwa mwà kwambiibwa. Ncyèna—ncyèna ànu muswe kwangata díbà dyàbùngì mpindyewu nànsha, pa nàнку tudi ne cyà kubàtiiza. Èyo.

128 Yèyè mmubwangate kàdi kí mmwenabù mùdibi bilòmbiìbwe menemene to, Sàtaanà awu's. Pàvwà mwenabù menemene—mwenabù menemene—mwenabù mubùjimije, kùdi ànu mùshindù ùmwèpelè ùdibu mwà kupikudiibwa. Mpindyewu, awu's nkùdi cilongo cyà mu dísu, kí umwèpelè uwwa mwà kubùpikula mùdibi bilòmbiìbwe. Mpindyewu, mu bushùwà bwà bwalu, tudi ne eci mu dileidiibwa dyà kùdi virgo dyà Yesù Kilistò.

129 Mpindyewu, ndi muswe kwamba cintu kampànda mwaba ewu. Cintu cyà kumpàla citùdi baswè kwalukidila, ncyà ne, twètù baalùkile mu—mu Dipungila Dikùlukulu emu, Ngeela meeji ne ndi mucifunde kaaba aka mwaba kampànda, Lewitikì 25. Mu Lewitikì 25:23 ne 24, nudi mwà kupeta mikenji yà bupikudi, nwènù bàdi bàfùnda abu. Bwà kupikula cintu kàna cyònsò pàdi muntu kampànda . . . Pààkapèèsha Nzambì Izàlèlèlè bwèndè . . .kwabanyina buloba bwèndè ku cyanza cyà Yoshùwà,

cifuku cyònsò ne muntu yònsò wàkapèèbwa buloba mwaba ùvwà bânà bèndè bapyàne civwà cyèndè—cyèndè citùpà.

¹³⁰ Mpindyewu, bu muntu awu mushààle mupèlè ne mujimije ní ncinyi cyònsò kùdì mukwàbò, ewu...nènku mùshindù ùmwèpelè ùvwàci mwà kupikudiibwa ùvwà nku cilongo cyà mu dísù. Kàdi civwà ànu ne cyà kwalukila ndekeelu wa byònsò. Muntu ewu ùdì ànu ùcilama bwà mukùngùlù kampàndà wà cikondo. Cìdì ne cyà kwalukidila mwenaci wà ku cibangidilu awu. Cyà bushùwà! Cìdì ne cyà kwalukidila mwenaci wa ku cibangidilu awu. Kùdì...bòbò bàà mu cifuku cyà Yudà, byòbì biikale. . . Yèyèkù kàdi eci cyabanyina tatwèndè, dìbà adi civwà cyèndè, anyi cilongo cyà mu dísù kampàndà civwà mwà kucyàngata. Kàdi, mpindyewu, muntu nànsha umwe mùdìbi bilòmbiibwe kàvwa mwà . . .Bàvwa mwà kucilama, bàvwa mwà kulamapù mikàndà yà bwena cintu. Bàvwa mwà kulamina mikàndà yà bwena cintu too ne pàvwà dibànza difuciibwa, kàdi pàvwa muntu mukùmbànyìne ulwa, muntu uvwa ne. . .

¹³¹ Twambebi, cileejilu, bu mèmè mwikale mwena katùpà kampànda kàà buloba kàdi kukàjìmija, ne mèmè kukàsùmbisha kùdì Mwanèètù Neville udi mwikale wa mu cifuku cikhwàbò, cyà Yudà, anyi pàmwàpa mucìsùmbishe mwenyi. Ne yèyè mushààle mwenaci mùdìbi bilòmbiibwe, mushààle mwenaci, ùdì mwà kubwelamù ne kucìdimisha ne kwangata bìdì bipatukamù abi, ne bikwàbò, kàdi bulelèlè ùdì ànu mulame mikàndà yà bwena cintu. “Kèna mwà kushààla mwenaci to,” aci ki civwà mukenji wà mu Izàlèlèlè. Mpindyewu nudi nubala mu—nubala mu Lewitìkì 25, nènku nenùmòne ne kabàvwa mwà kushààla beenaci mùdìbi bilòmbiibwe to; yèyè ùdì ànu *mucilame* nàka.

¹³² Èè, mpindyewu, cileejilu, mwanàanyi wa balùme ùvwà muswè. . .Billy, udi paanyimà pààpa wàwa, muswè kwangata wanyi. . .kulwa kusùmba buloba ebu. Èè, dìbà adi, pìikalabi mwenyi awu anyi Mwanèètù Neville anyi—anyì muntu kampànda mukwàbò mushààle naaci, mwikala mulame mikàndà yà bwena cintu bwàci abu. . .Mpindyewu, pìikalabi ne ewu ki uvwa cilongo cyànyì civwà cilonda, ùvwà mmashi à ku mèmè, yèyè kàvwa mwà kushààla mucilame ntàntà mule to. To, mukalenge. Bìvwa bikèngela àcilekèlèlè, èyowà’s, mukalenge, pàvwa ànu mushinga awu ùfuciibwa, pàvwaye umupèèsha, twambe ne, ndola binunu makumi àbìdì ne bitaanu bu mushinga wa citùpà cyà buloba aci.

¹³³ Èè, dìbà adi, ambà tũng, Mwanèètù Tony mmufwànyìne kulwa e kwamba ne: “Mwanèètù Neville, Mèmè nènsumbè citùpà cyà buloba cyà Mwanèètù Branham.” Kàvwa mwà kucyènza to.

Mwanèètù Neville ùdì wàmba ne: “To, mukalenge, ncyèna muswè kucìsùmbisha to.”

“Èè, ncinyi cyùdì mufwànyìne kucìfidila?”

“Binunu makumi àbìdì ne bitaanu.”

“Èè, nênkupèèshè—nênkupè binunu makumi àsàtù ne bitaanu. Nênkupèèshè *cikampànda*.”

“Cyûdi muswè nànsha cyôci cinyi. Ncyèna muswè kucisumbisha to, nêncilamè.”

¹³⁴ Kàdi Billy Paul ùvwa mwà kulwa kwamba ne: “Ndi muswè bwà kwangata cintu cyà Papa wanyì, binunu byèbè makùmi àbìdì ne bitaanu mbyôbì ebi.” Bìvwa bìkèngela àcilekele ciye. Ncyà bushùwà, bwalu aci’s ki civwà mukenji.

¹³⁵ Kaa, Àlèluuyàh! Hmm! Ndi ntèkemena ne nwênù beena Kilistò nudi nucimòna. Twètù tudi mukèlè wa buloba. Nzambi ngudi mufile eci kùdì bânà Bèndè. Yèyè wàkatupèèsha bukòdokeshi pa bufùki bwònsò, pa nyama yònsò, pa mwoyi wònsò myaba yònsò. Kàdi Adàmà, tatwètù, wàkabijimija kuyabì kùdì Sàtaanà. Kàdi cidi cikeeyeka penyi? Kùdì Mwenaci menemene, Nzambì Wàkacyèna awu. Amen!

¹³⁶ Kabyèna bikemesha to pàakamba Yone ne yèyè “wàkadila bujindejinde,” bwalu kàvwa mwà kusangana muntu nànsha umwe uvwa mukùmbànyine bwà kucìpikula to. Muntu awu ùdì ne cyà kwikala mukùmbànyine. Yone kwamba ne: “Mémè kudila bujindejinde pàvwaku kakùyi muntu uvwa mukùmbàne mwà kwangata Mukàndà anyi kuWùtàngila anyi kukùtulula bitampì byàwù.” Yèyè ne: “Kí. . . Muntu nànsha umwe mu Dyulu, muntu nànsha umwe pa buloba, muntu nànsha umwe mwinshì mwà buloba, muntu nànsha umwe ní mpenyi ní mpenyi.”

¹³⁷ “Muntu nànsha umwe.” Mpindyewu, yèyè kàakadyombola Banjèlò to. Vùlukàayi ne, buloba ebu kabwàkafidiibwa kùdì Banjèlò to. Eci’s mbumpyànyì bwà muntu. Ngabùdyèlè ùvwa mukùmbànyine, bushùwà; muntu mukwàbò ùvwa mukùmbànyine, Mikàlèlè ùvwa mufwànyine kwikala mukùmbànyine. Kabìyi bu. . . Ùvwa mufwànyine kwikala mukùmbànyine bwà kucyèenza. Kàdi kakùvwa muntu mukùmbànyine to. Nwamònu anyi? Ki Yone kuboobolayè cibòbò wa mwadi.

¹³⁸ Muntu kampànda wàkamba ne: “Mbwalu yèyè kàakadisangana mukùmbànyine to.” Kabyèna nàngu to. Muntu awu ùvwa mwinshì mwà bwenzeji bwà Nyumà Mwimpè, kàvwa mwà kwenza cilèmà cyà mùshindù awu to. Kàdi yèyè—yèyè ùvwa. . . yèyè—yèyè ùvwa—yèyè ùvwa. . . Kàvwa ànu mukùmbànyine yèyè mwine to, kàvwa mufwànyine kupeta muntu mukùmbànyine to.

¹³⁹ Pa nàngu ànu dībà adi kwambaye ne: “Mukulu kupatukaye anyi mwanjèlò wa dikàndà, kwambayè ne: ‘Kùdidi mwadi to, bwalu Ntambwe wa cisàmbà cyà Yudà,’” (Amen!) “Muji wà Davidì, Yèyè mmutàmbè bukole!” Amen! “Mmucimùne,” mu ngaakwilù mukwàbò ne. “Mmukùmbànyine kwangata Mukàndà!” Amen.

140 Vùlukàayi ne, yèyè kàvwa mwanji kuMumòna too ne mu cikondo eci to. Bwà cinyi? Ûvwa musòmbe pa... musòmbe pa Nkwasa wa butùmbi muntwamu, Nkwasa wa butùmbi wa Nzambi. Ûvwa munda mwà mwaba wà cijila. Kàvwa muMumòne too ne dībà adi to, nàнку Yone ùvwa ùtèkemena kumòna Ntambwe ù—ùpàtuka, kàdi wàkamòna Mwànà wa mùkòòkò!

141 Ki bwalu mbwòbù abu's, bânà bèètù. Ku bupòle, ku kalolo, ku Nyumà Mwìmpè nkutùdi tucimuna. Kì nkampànda munène wa mfyondo wa mamanya makolè à mu mutù to, kàdi ewu udi mwà kudipwekesha awu ki muntu udi ucimuna. Muntu udibo mwà kuyoobeshiibwa eku ne eku cicolà ushàala ànu musadidi wa Kìlistò, s'ki mucimunyi awu's.

142 Mpindyewu, wàkamba ne: “M'Mutàmbe bukolè. Ne Yèyè mmukùmbànyine bwà kwangata Mukàndà awu ne kuWùkangula ne kulamuna bimanyishilu byàwò.”

143 Mpindyewu, netùjandule paanyimà pàà katanci, pàmwàpa kî n'leelù ewu to, kàdi bìdi bìtampì mwandamutekète ebi bilamine, ne cyàkenzabì.

144 Mpindyewu, twàngatàayi ndambù pa “bupikudi.” Kumpàlà kwà—kumpàlà kwà muntu ewu kufwànyina kwikalà... kufwànyina kupikula, cintu cyà kumpàlà, bìvwa bikèngela kwikalayè mukùmbànyine, bìvwa bikèngela kwikalayè muntu wa mùshindù mujaalàme. Pa nàнку eci cyàkakùmbana pààkalediibwà Yesù Kìlistò, dilediibwa dyà kùdi virgo, bwalu Yèyè ùvwa Nzambi. Yèyè ùvwa Nzambi Yèyè mwinè muvwijiibwe muntu, Ûvwa Nzambi mu mubidi wà buntu. Byàkakèngela bwà kwikalayè mukùmbànyine; ne Mashi à kazeeza à Yesù Kìlistò àkamuvwija mukùmbànyine. Mpindyewu, tudi tusangana ne, panwikala baswè kuya ku Mufundu wàci, wà Peetèlò wa Kumpàla 1:18 too ne ku 20, panwikala nufunda Mifundu ayi. Byàkakèngela bwà kwikalayè mukùmbànyine. Ne Yèyè ùvwa mukùmbànyine, bwalu Yèyè wàkawwàla mmwènekèlu wa muntu. Wàkalwa muntu, Nzambi wàkalwa cilongo cyètù. Nènku apu tudi tusangana dībà adi ne citùpà cilenga ncyà Yèhowàh Nzambi muvwijiibwa mubidi ne kusòmbela munkaci mwètù bu Ewu uvwa mukùmbànyine. Amen.

145 “Yèyè wàkatàmbe bukolè.” Nzambi wàkawwàla mmwènekèlu wa mubidi wà buntu, Wàkalwa pa buloba, wàkalediibwa mwànà mukèsè wa mu dibòko ne kwendakana munkaci mwètù. Ne ku Mashi Èndè à cijila Yèyè wàkatàmbe bukolè.

146 Mpindyewu, mu Dipungila Dikùlukulu, mmunyi mùvwa muntu ne cyà kukobola bìdi bu byèndè, ùvwa wenza cinyi? Ûvwa wàngata mukùlù, bakùlù dikumi, ne uya ku ciibi cyà musòkò bwà kwamba cìvwàye wènzà aci, bwà kupikula cyàkadiye mujimije, ne uleeja ne yèyè mene nganyi, nènku ùvwa ufila

bujaadiki. Tudi tusangana bwalu bulonda bulenga mwaba ewu (Ànu mùmvwà mufunde tuntu tukesè kaaba aka bwà...bwà ncílù kubùpwa mwoyi to, bu mùdì mijilu mintàndàbale mu dindà emu.) bwà Luutà, cilongo ne Boàzà. Tuvwa baciyiile kî nkwanji kupita ntàntà mule to. Ndi muswe mpindyewu bwà nwênù kumòna bitùpà bisàtù byà diikisha edi.

¹⁴⁷ Ndi muswè bwà numòne diikisha dyà Èkèleeziyà, ànu cintu cìmwècìmwè aci menemene. Mpindyewu, tàngilàayi. Mwaba wa kumpàla wutùdì tusangana, bu mutùdì bwònsò bayiile diyiisha adi dyà ne: *Cilongo Cipikudi*, Nzambì wàkavwijiibwa mubidi bwà kulwa Mupikudi. Úvwa n'Yèyè awu mu nshapità mwi5—mu nshapità mwi5. Wàkamba ne:

*Nènku kakwàkadi muntu nànsha umwe mu dyulu,
nànsha pa buloba, anyì mwinshì mwà buloba,
uvwa mukùmbàne bwà kukangula mukàndà, anyì
kuwùtàngila.*

*Ki mèmè kudila bikolè, bwalu kabàakasanga muntu
nànsha umwe mukùmbànyine bwà kukangula Mukàndà
awu anyì kubala—anyì kubala mukàndà awu, anyì
kuwùtàngila.*

*Nènku umwe wa ku bakùlù wàkangambila ne: Kudidi
to: mòna, Ntambwe wa cisàmbà cyà Yudà, Muji wà
Davidi, wàkatàmba bukolè bwà kukangula mukàndà, ne
kukùtulula bitampì byàwù mwandamutekète.*

Yèyè ki Umwepelè, Yèyè ki Mwinè utùdì bindile.

¹⁴⁸ Mònaayi mùshindù úvwa Luutà...mùshindù...ne Naòmì, Boàzà kàdì's ki cimfwànyì cipwàngàne. Mwàkashiyà Naòmì èkèleeziyà mu cikondo cyà lukòta, kushiya ditùnga, kuyaye mu buloba bwà beena Moàbà bwà kusòmbamù ne kushikamamù. Yèyè kujimija byònsò byàkadiye naabi. Nènku pàakamanaye kuya, bàyendè, Elimelekè, kufwàye pàvwàbo basanganyibwa kuntwaku apu, ki kwenzekabi ne bumpyànyì bwèndè buye kùdì muntu mukwàbò. Dìbà adi patùdì tulwa...pààkaalukilàye, wàkalwa ne nsongààkàjì mulenga wa beena Moàbà mukàjì mukàmbà. Nènku Boàzà mmwenze ànu umòna mukàjì mukàmbà ewu, cifwanyikijilu cyà Kilistò, cyà pa mwoyi kumwaba bwèndè. Ki kumunangaye. Nànku, byàkakèngela bwà yèyè kupikula, mùshindù ùmwepelè úvwaye mwà kumupetela bwà kwikalaye mukàjèndè úvwa nku dipikula cìvwà mwanààbò, Elimelekè, mujìmjè.

¹⁴⁹ Nànku ki dìbà adi kukonkaye mwanààbò mukwàbò awu ní úvwa mufwànyine kucìpikula, wa pabwìpì mumutàmbe yèyè, kàdi awu kàvwa mwà kucyènza to. Ki kupwekaye bwà kwenza cileejilu cipwàngàne cyà mikenji yà Nzambì. Kuyaye ku biibi byà musòkò ne kukòpola cisàbaatà cyèndè, ne kwamba ne: “Leelù ewu bìmanyike ne ndi mupikùle byònsò byàkadi naabi Naòmì abi. Byònsò bidiyè naabi, cyònsò cyàkajimija

Elimelekè (mwanèètù), mpindyewu mèmè ki cilongo cyà mu disù, nènku ndi ewu udi mwà kucipikula ki pàndi mulwe kucinana apa. Pìikalaku muntu kampànda mwab'ewu udi mwà kuleeja kabingila kajaalame, anyi muntu kampànda wa pabwipi kuntamba mèmè, àditèèje tumanye.” Nènku bantu bwònsò kushàalabo bapüwa. Ki kukòpolaye cisàbaata cyèndè ne kucyèlaye muulu bu bujaadiki ne: “Ndi mupikule cyònsò cyàkadì naaci mwanèètù, Elimelekè, aci.” Bwà cinyi? Yèyè ùwva cilongo. Ùwva cilongo cipikudi. Kaa, mùshindù mwinè ùdìbi bilenga's wè! Mbwalu bulonda bulenga bwà dikèma's.

¹⁵⁰ Nènku pashìishe, cikondo cyònsò eci, Luutà ùwva mwikishe ne mwindile bwà kujandula mùvwàci mwà kujika. Pashìishe kwalukilaye, kakuwaku muntu uvwa mwà kufila bujaadiki bwà bùcipiisha to. Kwalukilayè e kwangata Naòmi...ne kwangatayè Luutà, mwànà wa bakàji mulenga wa beena Moàbà awu, ne kusèlanganabò ne kusòmbelabò mu bumpyànyi abu. Mbwalu bulonda bulenga kaayipu's wè!

¹⁵¹ Kùdi bitùpà bisàtù byà Luutà. Luutà—Luutà, *ùpàngadika*; ùwva *ùpàngadika* ní ùwva mufwànyine kwangata dipàngadika anyi to, bwà kwalukila kwàbò kumulela (ànu mùdì Èkèleeziyà amu). Luutà, *ùkwàta mudimu*; pàakapàtukàye bwà kupùmbulula. Luutà, *wikisha*; ki cidi Luutà munkaci mwà kwenza mpindyewu (Èkèleeziyà). Mpindyewu Luutà, *mufucùbwe*; mpindyewu ki mwaba awu, anyi, cintu cidi cilondà cyènzeka (ki difutu dyà Èkèleeziyà).

¹⁵² Mpindyewu, katwèna mwà . . . Ncyèna ne díbà to, bwalu nudi ne mudimu wà dibàtiiza ne tukàadi mpindyewu díbà dikumi ne ùmwè ne tusunsa dikumi ne tutaanu. Kàdi pàmwàpa netwàngatè eci mu dyàlumingu dilwalwà edì anyi mu dyàlumingu kampànda dikwàbò mu matùkù àcilwalwà, bu Mukalenge mwà kwanyisha. Nènku ndi muswè kwangata eci eci, bwà kuleeja nsèngu mwandamutekète eyi ne mèsù mwandamutekète, ne menemene bitampì mwandamutekète abi, midimu mwandamutekète yà bwambi, banjèlò mwandamutekète bàà èkèleeziyà, mitootò mwandamutekète, ne . . . Kaa, ànu bikesè ebi . . .

¹⁵³ Nènku cintu cyònsò nkòong ncidìswikile ànu mwab'ewu. Èyowà's, mukalenge. “Bikèngela ikale mukùmbànyine,” nànkù's Yesù mmukùmbànyine. Ku dipingana Dyèndè netusànke bikolè byà menemene bwà kaabujimà kàà mabènesha à bupikudi. Bapòle nebàpyanè buloba. Balùme ne bakàji nebàalukile: bàna bàà balùme ne bàà bakàji bàà Nzambi. Nènku cikondo cyà Bukalenge bwà bidimu cinunu bujimà necibange. Ncintu kaayipu cilenga's wè!

¹⁵⁴ Ne Mwanjèlò wa dikàndà ne díyì dikolè, ukobola ne: “Udi mukùmbànyine nganyi? Nganyi udi ne bukolè bwà kwenza cyòci eci?”

155 Ki pashiishe mukùlù awu kwambayè ne: “Kùdidi mwadi to, bwalu Ntambwe wa cisambà cyà Yuda, Yèyè mmukumbànyine ne Yèyè mmucimùne.”

156 “Ne kwangataYè Mukàndà ne kubuululaYe Mukàndà ne kulamuna bitampì byàwù.” Kacya Yèyè kàakambaku cyàkabènzekela to. Patùdi tukalenga bitampì mwandamutekète abi bikàngudiibwe ànu lwà mu Bible amu, tàngilàayi cyàkenzeka. Ànu mu Mukàndà mutwa bitampì mwandamutekète mutùdi tubwela mpindyewu emu ewu, ngudi mulame bwalu busokoka bujimà bwà mabènesha ónsò à bupikudi à Nzambi. Vùlukàayi ne, Yèyè ùdi Mwànà wa mùkòòkò, Yèyè ki Umwèpelè wákacipikula awu. Nènku, nwavùlukaayi ne, mmutwà bitampì lwà paanyimà pàà Mukàndà, kì mmufùnda munda amu to. Mmutwà bitampì lwà paanyimà, kàdi kì mmufùnda lwà munda amu to. Nènku Yèyè ki uvwa Umwèpelè uvwa mukumbàne bwà kukàngula Mukàndà awu mene anyi kubuulula Mukàndà anyi kubuulula bitampì, Umwèpelè uvwa mwà kucyènza.

157 Nànku eci’s ncintu pa bule, mbafwànyine kukòkangana pa bwalu ebu munda emu, pa cidìwu, kàdi, Yèyè’s ki Umwèpelè udi uWùmvwija mu bunzambi. Kàdi lwà paanyimà apa kakwèna muntu nànsha umwe udi mwà kucyumwija to. Abu mbumutàngile Yèyè ne ànu Yèyè nkàayende, ne Yèyè ki Umwèpelè udi mwà kubuulula maalu masokoka mwandamutekète awu. Kàdi tàngilàayi mùdi kantu ne kantu kààci kiikale mu bupikudi, mshindù ùvwa Èkèleeziyà mupikùdiibwe ne ciikala dipikudiibwa.

158 Kaa, twanjàayi ànu kuMunanga ne myoyi yètù yònsò, kwenza cyònsò citùdi mwà kwenza aci.

159 Mufùndi kampànda ùvwa ufùnda bwalu bulonda kampànda. (Kumpàla ànu kwà mèmè kujikija ne kwalujila Mwanèètu Neville masangisha.) Nudi nusànka ne Bwàkabalwibwà anyi? Kaa, mème’s ntu muBùngè. Twangàci ànu mvensà yisàtù yà cyòci aci mu dindà emu, kàdi netùcyàngatè cyàkàbidì. Mònaayi. Tudi ànu . . .

160 Mufùndi kampànda ùvwa ufùnda mukàndà kampànda pa bwalu bwà nsongàakàji wa citende uvwa uteeta bwà kupeta Nzambi.

161 Nènku misangu mivule yitùdi tukebangana ne Nzambi ne tukeba Nzambi, ne pùikalàbi ne Nzambi ùvwa ànu myaba yònsò ne wèwè. . . Ùvwa ne munène menemene. . . Èè, bu ne Yèyè ùvwa ne nkwasà munène menemene wa butùmbi musòmbe kaaba aka mwaba kampànda, díbà adi’s bantu bònsò mbafwànyine kwitabuuja Nzambi. Bu Nzambi musòmbe pa nkwasà wa butùmbi munène mwaba kampànda ewu; wàmba ne: “Yèyè mmusòmbe mu cimenga kampànda eci ne ki Yèyè ewu. Kì Nzambi ewu nènku ndàayi kùdiYe. Yèyè ùdi

ānu mwā” [Mwanèètù Branham ùdi ùtuuta cishòndò—Muf.] “kucìkùdimuna mùshindù *kampànda*,” mòna’s, bantu bònsò bàvwa mwā kuMwitabuuja. Dìbà adi diitabuuja’s òvwa difwànyine kwikala cintu patùpù. Kabivwa kutùkèngela bwā kwikala ne diitabuuja nànsha dyā kànà to dìbà adi, nudi numòna, bìvwa mwā kwikala nànkù. Aci neciikalè mu Bukalenge bwā bidimu cinunu, kàdi mpindyewu Yèyè ùdi ùbìikila ne uteeta bwā kujandula ne mbanganyì. . . Bìdi bìmweka byā kabiyì byumvwika ne byā mifitù, ne, kanwèna bamanyè mwā kupita naabi nànsha. Kàdi ku diitabuuja tudi tuCìitabuuja! Tudi twitabuuja. Ki bwā cinyì eci cìdi nànkù. Udi mumvwè aci anyi, Mwanèètù Elmer? Nwamònu anyi? Aci. . .

¹⁶² Mpindyewu, piikalàbi ne Nzambi mmusòmbè pa nkwaswa wa butùmbi. Ki yèyè ne: “Mòna’s, ki Yèyè ewu. . . ki Yèyè. . . ki Nzambi nyèyè ewu. Yèyè mmusòmbèle mu mwaba kampànda, netùye kuntwaku.” Kàdi kwamba ne: “Mukalenge Munanga, Nzambi, udikù mwā kucyènza anyi?”

“Èyowā, Nèncyènzè.” “Shhi!” Nènku neciikale cyenjìibwe, nwamònu’s. “Èè, mu bushùwā bwā bwalu, aci’s ki Nzambi. Nwamònu anyi? Ekèlekèle, aci tudi bamòne.” Pa nànkù kakùvwa kufwànyine kwikala dijinga nànsha dimwè. . . diitabuuja òvwa kwikala òvwiijìibwe cintu patùpù. Diitabuuja kadyèna ne dikwacisha to paùdi mutwìshìibwe.

¹⁶³ Ambaayibi tǔng bu ne muntu yònsò pa buloba apa ùvwa mwena Kilistò? Ambaayibi tǔng bu ne muntu yònsò ùvwa mwe—mwena Kilistò mùjìibwe ntèntè ne Nyumà Mwìmpè? Mòna’s, katùvwa bafwànyine kwikala dijinga ne diitabuuja kàbìdi to, katùvwa bafwànyine kujinga diitabuuja nànsha kakesè. Kàdi’s diitabuuja ki mene—ki cintu mene citùdi basùngidìibwe ku cyòci, n’diitabuuja. Nènku ki cìdi cyenza ne kwikale bàmwè bàdi kabàyi bapetangana naaDì to, bwā twamòna mwā kukwàta mudimu ne diitabuuja. Nudi nucyumvwa mpindyewu anyi? Bikèngela wikale ne luseke lukwàbò. Nwamònu anyi? Bikèngela kwikalè mukàjì mubì bwā kushìisha kufikisha wa cyā bushùwā menemene awu ku dipàtukilayè patòòke. Nwamònu anyi? Bikèngela kwikalè mashimi bwā kuvwija Bulelèlà bwā cyā bushùwā ne kuBùfikisha ku dikenka bìmpè bitàmbe. Bu ne byònsò bìvwa Bulelèlà, Mbufwànyine kwikala ānu bwā mwasàkànaayi ebu, nwamònu’s. Nwamònu anyi? Kàdi, nudi numòna’s, ncintu cyā bumfùmù, ncintu cilelèlà, pàdi Bulelèlà ne diitabuuja ne bikwàbò. Mpindyewu, ki bwalu mbwòbù abu’s.

¹⁶⁴ Mpindyewu, bikèngela twikale ne byā bìmpè ne byā bibì abi. Ki mùshindù ùdìbi byènda’s. Bikèngele kwikala ne matùkù mìmpè bwā kukufikisha ku disànkila. . . anyi matùkù mabi bwā kukufikisha ku disànkila à mìmpè. Bikèngela kwikala ne kaadisaamà kakesè bwā kukufikisha ku disànkila mubidi tumatuma. Nwamònu anyi? Nènku bikèngela ùpweke mu bibandabanda bwā kukufikisha ku disànka ne nsongu yā

mikùná. Nànkú díbà adi òm̀wè dyà ku matùkù aa neciikale cyònsò lusongo lwà mukùná, neciikale mubidi tumatuma, neciikale Nzambì, neciikale disànkà, ànu...nekwikalè—nekwikalè masànkà à kaàyi ndekeelu. Kàdi patùdi katùyi banji kufika ku ciine cikondo aci, nwamònu's, tudi ne cyà kwikala ànu ne bìmpè ne bibì ebi.

¹⁶⁵ Mpindyewu, muntu yònsò udi mumvwè àmbe ne: “Amen.” [Disangisha didi dyàm̀ba ne: “Amen.”—Muf.]

¹⁶⁶ Mwànà wa bakàji ewu ùvwa wàm̀ba ne ùvwa uteeta bwà kupeta Nzambì mwaba wònsò ùvwaye ùya. Ùvwa mufwànyine kuya ku ewu èkèleeziyà ne ku wàwa èkèleeziyà, ne bikwàbò byònsò, kàdi kàvwa mwà kuCipeta to. Kàdi mmwenze ànu ùpeta, wènda ùpweka ne njila, kùvwa Muntu kampànda mununu mukesè wènda ùpweka ne njila awu, Mukwàcikwètù mukesè, ne Yèyè ùvwa ne kàtèdralè kajimà kanène kambula paanyimà pèndè. Ùvwa wènda ùpweka ne njila. Ki yèyè ne: “Kaa, Muntu mwimpè wetù!” Nsongàakàji ne: “Èkèlekèle, abi's mbitàmbe bulenga Bwèbè,” yèyè ne, “kàdi Wèwè—Wèwè—Wèwè's udi mwambùle cintu cijimà paanyimà Pèèbè apu,” yèyè ne, “aci's, neciKuzàzè's.”

Yèyè ne: “To kacỳàkuNzaza to,” mwàkambaye, “bwalu Mèmè ki Lubwebwe lùdìbo baciibàkilepù.” Ki Yèyè awu's.

Tùsambilàayi:

¹⁶⁷ Éyi Lubwebwe lwà Bikondo, ndi ne disànkà be dyà kwikala ànu mbanda mpweka munda mwà kàtèdralè, mumanyè ne tudi biikishile pa Lubwebwe. Kaa, Lubwebwe elu, Lwàkamba ne: “Kabyèna ne bujitu butàmbe bwà dibèji nànsha.” Kàdi bu mùdi Lubwebwe lubanga kutentemuka naaci ne lukàsà lwònsò, tungonga tulenga tudi tubanga kudila munda amu. Éyi Lubwebwe lwà Bikondo, tùsokòkèku mu luse Lwèbè. Pweka neetù mu njila ne mu musùlù wa mwoyi mwikala myoyi yètù myùjùbwe ne disànkà ne matùmbi àdi àKwimbila njila mujimà.

¹⁶⁸ Tudi tuKusàkidila bwà ditùkumbula dyà mu dindà emu dyà Nyumà Mwimpè mu Dìyi, mùdiYe mubwele ne muvwije Dìyi dilelèlè menemene kutùdi. Tufwileku luse ku mapanga ètù ne ku byònsò bitùdi bènze anyi bàmbe bivwà bibì abi, tufwileku luse bwà byòbì abi. Tùkwàcishèku bwà kwikala beena Kìlistò batàmbe bwimpè, Taatù Nzambì. Tudi tulòm̀ba bwà luse Lwèbè lùshaalèku neetù.

¹⁶⁹ Ndi ndòm̀ba, Mukalenge, pùikalàbi ne ndiswa Dyèbè, bwà twamònakù mwà kwalukila cyàkàbìdi ne lukàsà lwònsò bwà—bwà kujikija nshapità eyi kaaba aka ne kwangata bitampì mwandamutekète ebi. Tudi—tudi bindile ciine cikondo aci, Mukalenge, bwà ne pawikala Wèwè—Wèwè—Wèwè mutwanyishile bwà kwenza nànkú. Nènku, Taatù, ànu kaaba aka mene mu èkèleeziyà wetù mukesè sungasunga ewu tudi tulòm̀ba bwà Wèwè kutwenzelakù nànkú, bwà twamòna

mwà kuumvwa bintu binène byà Nzambì ebi. Ki mbwalu tudi bacikumbànyine to, Mukalenge, kàdi mʼoyi yètù yidi ne nzala eyi yidi yìzòloloka mashi bwà bwalu abu. Tudi tulòmba bwà Wèwè kucifila.

¹⁷⁰ Tudi tulòmba bwà Mwanèètù Neville, Mukalenge, mpaasàtà wetù wa lulamatu mutuma kùdi Nzambì ewu. Tudi tumulòmbela bwà wamukwàcishaku ne wamubènesha, yèyè ne mukàjèndè mukesè wa kalolo, kakwàcikwetù kalenga kumòna aka, ne bânà bèndè balela.

¹⁷¹ Tudi tulòmbela balubuludi bwònsò ne balami ne bantu bwònsò bàdi bàlwa mu èkèleeziyà ewu abu. Kí ànu bwà bèètù nkààyaabù to, kàdi bwà bakwabò ne bwònsò bàdi bàsòka Dìna Dyèbè. Ndi ndòmbela balunda bàanyi bàdi mu ditùnga dijima, ànu kapeepà kàà dimanyisha nàka kàdi's ki bwòbò aba. Taatù, ndi—ndi ànu nKusàkidila bwà cyôci eci.

¹⁷² Ndi ndòmba bwà Wèwè kwenza ne ditùkù dyàlwakù lùkasa dyàlwà Yesù ne ditwikale badikungwije pàmwè mwaba wìkala kakùciyì ní mmuunya ní mbutùkù, anyì ní ncikondo kàbìdi, necyèngulukile mu Cyèndèlèlè ne mwaba utùdi mwà kwikala bwònsò bwà kashidi. Enzaku nàнку, Mukalenge.

¹⁷³ Nènku kwòkò kwikale bàmwè mwab'ewu mu dindà emu, Mukalenge, bàdi kabàyi baKumanye bu Musùngidi wabò awu, swàku bwà bajingeku bwà kumanya Mwànà wa mùkòòkò Udi mukwàte Mukàndà wà bitampì mwandamutekète wa maalu masokoka mu cyanza Cyèndè awu. Nzambì, swàku tuMumanye bwà ne matùkù àcilwalwà patwàmòna bitampì abi bicibula bikangula dìbà adi tudi mwà kumòna cìdi Nzambì wàkula neetù. Tudi tulòmba nùnkù bwà butùmbì bwà Nzambì, mu Dìna dyà Mwan'Endè, Yesù Kilistò.

Nènku patùcìdi ne mitù yètù miinyika apa:

¹⁷⁴ Nkufwànyinekù kwikala muntu kampànda wa wàmba ne: “Wamvùlukakù, Mwanèètù Branham, pàudi usambila apu, ne ndi muswè bwà wamvùlukaku mu disambila anyì?” Nzambì àkubènèshè. Nzambì àkubènèshè. Nènku Nzambì àkubènèshè, ne wèwè, ne wèwè. Èyowà. Nzambì ikalè mwìmpè kùdi. Èyowà. Pàmwàpa byanza makumi àbìdi ne binaayi, anyì bipìte apu, mbyela muulu.


¹⁷⁵ Èyi Mukalenge, Udi mumòne byanza byàbò, Udi mumanyè dijinga dyàbò. Udi mumanyè cìdi mu mwoyi wàbò, mèmè ncyèna mumanyè to. Ndi ndòmba bwà Wèwè kubàbuulwila, Mukalenge, bwìmpè Bwèbè ne luse Lwèbè. Ubàfwileku luse bwà cyònsò cìdìbu benze aci. Pùikalaci disaama, Mukalenge, ondopa mibidi yàbò ne ubàsangaje. Enzàku Taatù, pàdi dilaabiibwa dyà Nyumà Mwìmpè munkacì mwà disangisha apa, pa disangisha mpindyewu mene. Swàkukù bwà Nzambì munène wa mu Dyulu àtambè kulaaba ne Àbèneshèku ewu yònsò udi mu Bwikadi bwà Nzambì, bwà twamònakù mwà kuumuka kaaba aka mu dindà

emu, twamba ne: “Myoyi yètù kayìvwakù yilàkuka kapyà munda mwètù anyi?” Enzàku nànkù, Mukalenge.

¹⁷⁶ Mpindyewu, ndi ne butekètè ne mucyòke, dīyī dyànyī dikaadi dipatè, ne ndi—ndi ànu ndòmba, Nzambi, bwà dikàndà dyànyī sungasunga. Ne Ûnkwacisheku anyi? Ne Ûmpèèsheku dikàndà anyi? Ondopaku kapùtā kakesè kàdì munda mwànyī aku, Mukalenge. Udiku mwà kuswa anyi? Enzàku bwà Maanyī à Cijila à Nzambi akwateku mudimu mwab’ewu, ne mu mpùtā mukwàbò kàna ònsò, Mukalenge, mwaba wònsò ne kùdì muntu yònsò. Tudi baswè kwikala ne mwoyi, Mukalenge, bwà luumù Lwèbè ne butùmbi Bwèbè. Enzàku nànkù. Ne ondopaku babèèdì bwònsò ne beena ntàtu. Ne—ne Dyangàcìle butùmbi, Mukalenge, bwalu tudi tuumvwa ne kabyàkunenga to too ne patwikala. . . Katwàkwikala kàbìdì ne masangisha bu nùnkù to; neikale mamananè kujika, bwalu bwàwù nebwikale mu cikondo cimana kupita.

¹⁷⁷ Mpindyewu, Taatù, bèneshàku, mpindyewu, tudi tulòmba bwònsò pàmwè mu Dìnà dyà Yesù Kilistò.

¹⁷⁸ Ne pashìishe, Taatù, tudi baswè kulòmba kàbìdì bwà Wèwè kuvùlukakù aba bìikala mwà kubàtijiibwa mu dindà emu mu Dìnà dyà Mukalenge Yesù, bwà Wèwè kubàpèèsha dibatiiza dyà Nyumà Mwìmpè, butùmbi bunène ne luumù. Enzàku nànkù, Taatù. Tudi tuKulàmbulabì byònsò mpindyewu.

¹⁷⁹ Nènku, Taatù, ne byònsò abi, ndi ndyèlamù mèmè mwinè. Kùmpuku mwoyi to, Mukalenge, nkwàcìshèku mpindyewu. Ndi ndòmba mu Dìnà dyà Yesù. Amen. 

61-0611 Bwàkabuulwibwà, Nshapità Mwitàànù Citùpà I
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org